



Tablebirds
NO. 1 KAKARUK BILONG YUMII!

Tablebirds FARM FRESH
real fresh chicken!

proudly PNG MADE

BAIM PNG MADE NA KAMAPIM MOA WOK

Operesen bilong rausim ol WW2 bom bai kamap long Torokina

WANPELA spesel operesen bai kamap long Bogenvil long sapotim wok bilong wanbel, gutpela sindaun na sekyuriti long ailan.

"Operation Render Safe 2014" (ORS 2014) em dispela wok operesen bai kamap long Torokina, weskos Bogenvil. Bilong mekim ol wok redi long dispela operesen, wanpela lain bilong Difens Fos bilong Australia (ADF) i bin mekim wanpela wokabout 1 go long Buka na Torokina long dispela mun.

Dispela wokabout bai helpim ol lain long wokim ol wok plening long ORS 2014 bai kamap long Torokina klostu long pinis bilong neks yia, 2014.

Ripot i kam long opis bilong Hai Komisnin bilong Australia, Pot Mosbi, i tok Otonomes Bogenvil Gavman (ABG) i bin askim Australia long helpim ol long rausim planti ol bom i no pairap, ol gan na ol narapela samting bilong pait i stap yet long Torokina.

Ol dispela bom na gan samting em ol i stap yet long Torokina klostu 70 krismas nau, bihain long pinis bilong Wol Woa 2.

Ol soldia bilong Amerika na ol Alait poroman soldia i bin yusim Torokina olsem beis bilong ol long taim bilong Wol Woa 2(WW2) na pait egensim ol soldia bilong Japan.

Na taim WW2 i pinis, ol Amerika na Alait soldia i bin lusim planti ol bom i no pairap na tu, ol gan samting i stap gut yet long yusim.

Long taim bilong Bogenvil pait, ol Bogenvil Revoluseneri Ami (BRA) paitman i save go long Torokina na kisim ol gan samting bilong pait na yusim.

Tasol wanpela bikpela samting em ol bom i no pairap long ol pipel long wanem, nogat man i save na ol i ken pairap na kilim ol manmeri na pikinini.

Spesol kaikai bilong Misis Parkop...



Misis Parkop givim kaikai long sikmeri Kerry na bos meri bilong TB wod sista Paula Novete i lukluk stap.

Poto: Nicky Bernard

Moa stori long pes 2

Lukim Niu Yia toktok bilong Gavana Powes Parkop long p14

Polis mekim gutpela wok long krismas - p5

Gavana pasim olgeta buai maket long NCD

GAVANA bilong NCD, Powes Parkop i tokaut long Tunde dispela wik olsem NCD nau em bai kamap fri olgeta long bisnis bilong salim buai, stat long 1 Januəri 2014.

Mista Parkop i tokim ol nius lain long wanpela nius konprens olsem stat long 1 Januəri, em bai givim 7 de notis long olgeta maket insait long siti olsem, Lareva, Gerehu, Hanuabada, 6-Mail, Sabama na

Koki long stop long baim na salim buai. Dispela em i bihainim toktok bilong em long mun Oktoba 2013 we em i bin tok olsem bai i gat ol dispela maket i op yet long sotpela taim bilong ol i mekim wok long tupela

maket insait long Sentral Provins, em Laloki ritel maket na Ruburogo holsel maket bilong buai.

Moa stori long pes 3

Painim CASH MONI bilong yu insait long KEN

"Painim CASH MONI insait long GLOBE na SITA Corned Beef or Mackerel ken"

Na kamap Wanpela LAKI WINA NAU!

Sapos yu painim displa ol CASH Moni:


- K1,000
- K500
- K100
- K50
- K10

"Anit insait long ken" Go kisim CASH MONI bilong yu long Globe dealer or kolim **Globe Hotline 422 3066**

HARIAP!!!
Baim ol GLOBE na SITA ken mit or MACKEREL ken bilong yu NAU

Promosian bai pinis long 31st December 2013

GLOBE



Teksim Wari, Tingting, Painim Pren, Wantok o Pas bilong yu i kam nau.. Digicel namba: 7235 6149

Dia Wantok Niuspepa, mi wanpela sumatin bilong ITI long Kimbe. Mi askim gavman bai lukluk long ol praiwet skul tu long fri edukesen o nogat?
D.G Trappers, KIMBE

Dia Wantok Niuspepa, mi wanpela mangi Morobe na kam faul namel long bikpela bus bilong ol bus Kerema na stap long hia wantaim ol Kerema. Tasol wanem samting mi laik tokim em olsem; mi bin go skul tasol papa na mama bilong mi ol i nogat mani long baim skul fi bilong mi olsem na mi kam bek na stap long ples olsem na mi jas laik painim sampela sponsa. Bikos mi laikim stret long go bek long skul bilong mi. So mi jas laik painimaut tasol.

Dia Wantok Niuspepa, mi wanpela boi na mi save het pen long Raibu Kampani; Nogat gutpela reit. Ol isu i no save kam long namba bilong wokman stret, ol salim 5-pela isu kam lusim 6-pela mun, Salim 5-pela ken. Em olsem Donkey wok tasol nogat sen, bilong reit, nogat gutpela tems na bilong Kampani. Papa graun Kampani na pulim kainkain man kam wok, nogat wanpela papa graun wok olsem na hevi bai kamap yet. Olsem na menesemen mas tingting na mekim samting. Tenk yu.
18/12/2013

Dia Wantok Niuspepa, mi man long EHP, mi laikim prenim ol nambis meri na maritim. Yu husat gat laik ringim mi long dispela namba 7132 6630
16/12/2013

Dia Wantok Niuspepa, mipela long Makmak wod Melkoi LLG long Pomio Distrik i no save liklik long sampela hanmak long memba bilong Pomio, Paul Tiensten wantaim Leo Dion i go long boda. Mipela hatwok long votim ol na ol i no bekim bek dispela hatwok i kam, ating em bai orait moa sapos mipela bruk lusim Is Niu Briten na go Wes Niu Briten. Ol i save ol i no mekim wanpela samting noken sanap gen long 2017. Tenk yu.
Black Priest – 05/12/2013

Dia Wantok Nius, nem bilong mi McLoid Yomoke Kiyo mi laik prenim wanpela meri kawas stret. Mi yet mi mangi Mendi long ples ailan Teta. Plis ringim mi long namba 72001504. Kam stap wantaim mangi Mendi, tenk yu stret.
McLoid Y – 05/12/2013

Basil laik kotim Marape long DSIP

Stanley Nondol i raitim

Deputi Oposisen lida na memba bilong Bulolo Sam Basil i tok em bai kisim Minista bilong Fainens James Marape i go long kot long holim bek DSIP mani bilong 2013 bilong Bulolo na sampela memba bilong Oposisen.

Mista Basil i mekim dispela tokotk bihain long em i tokpait wantaim Minista James Marape na sekreteri bilong Fainens Dokta Ken Nanagen long Bulolo na sampela memba bilong Oposisen i no kisim DSIP mani.

Mista Basil i bin go long Vulupindi haus na tokim Fainens sekreteri olsem dipatmen na Minista Marape i no gat rait holim bek mani bilong ol pipel. Em i tok olgeta memba long gavman sait i kisim K10 na i no gat as long fainens i holim bek DSIP bilong em na sampela



Deputi Oposisen lida na memba bilong Bulolo Sam Basil.

memba long oposisen.

Mista Basil i tok Fainens i givim K3 milien tasol bilong K10 milien bilong 2013 DSIP mani aninit long 2013 baset.

Oposisen lida Belden Namah i kisim K1 milien tasol na i tok em les long tokpait. Em tok em mani bilong pipel na gavman i noken pilai politiks na holim bek divelopmen na mekim ol pipel i safe.

Mista Basil i tok Fainens i givim DSIP bilong 2013 o nogat, em bai kisim Minista James Marape i go long kot long painimaut sapos Mista Marape i gat rait long holim bek DSIP bilong Oposisen taim olgeta memba long gavman i kisim K10 milien.

Mista Basil i tok ol pastaim gavman bilong Praim Minista Bill Skate, Somare, Wingti, Sir Julius, Sir Mekere na Sir Rabbie i no save mekim dispela kain pasin maski Oposisen i bin strong na i gat bikpela namba.

Mista Basil i tok gavman i holim bek DSIP mani na laikim oposisen bai joinim gavman long pinism oposisen na ranim wansait gavman.

Mista Basil i tok kantri i nidim opisisen na em tok em bai no inap long joinim gavman long kisim DSIP.

Namba bilong Oposisen i pun-daun na i gat 6pela memba

tasol. Las man i lusim Oposisen em memba bilong Kundiawa Tobias Kulang. I gat bilip Mista Kulan i kisim K10 milien pinis.

Minista Marape tok em bai yet bai yusim DSIP mani bilong Mista Basil long sampela eria bilong divelopmen long Blolo distrik.

Tasol Mista Basil i tok dispela i no stret bikos em i siaman bilong JDP na BPC bilong distrik.

Morobe gavana Kelly Naru i singaut long Praim Minista Peter O'Neill long go stap namel long Mista Basil na Mista Marape long stretim hevi bilong tupela long DSIP.

Mista Naru i tok DSIP mani em I no bilong Mista Marape o Mista Basil. Em I tok bilong ol pipel long Bulolo.

Mista Naru i sapatim Mista basil na singaut long James Marape long givim K7 milien bilong Bulolo.

Jean Parkop givim ol presen long ol sik lain

Kolopu Waima i raitim

Taim bilong kisim Nu Yia em taim em taim we ol famili bai bung, amamas na kaikai wantaim.

Tasol ol sik manmeri, husat i stap long ol haus sik i no stap wantaim ol famili bilong ol long kisim dispela Nu Yia-2014.

Pot Mosbi Jeneral Haus sik, long TB wod na wod bilong ol pikinini, ol sik pikinini na manmeri wantaim ol was man na meri i amamas long lukim meri bilong Nesenel Kapital Distrik (NCD) Gavana Jean Pakop iraun i go lukim ol long tunde.

Misis Parkop i karim ol presen, kukim banana, kaukau, jus na givim long ol sik manmeri long ol i ken kaikai, amamasim ol yet na lukim nupela yia.

“Ol dispela presen em palm oliv i sponsa long en. Yupela yet sekim wanem samting insait long ol wanwan beg. Mi wantaim ol famili bilong mi na wok manmeri bilong Gavana Powes Pakop, i kukim ol banana, kaukau na baim ol jus. Mipela pilim olsem yupela tu i famili i stap long hevi na mipela sori na karim ol kaikai kam long givim yupela,” Misis Parkop i tok.

Em i tok ol planti lain tru i stap

long haus sik nai hat long ol bai go aut na painim ol kaikai.

“Mipela filim olsem yu wanwan man o meri slip long haus sik i no go aut na painim kaikai. Yupela tu bai no inap long stap wantaim ol famili bilong yupela long haus nalukim Nu Yia, olsem na mipela olsem famili i kam givim ol presen na kaikai long mekim yupela amamas na bungim tingting olsem mipela olgeta i stap wantaim na bungim Nu Yia,” Misis Pakop i tok.

Em i go long TB ward, skelim kaikai, na givim ol. Bihain em i kam long wod bilong ol pikinini na givim ol presen olsem ol doli, sop na kaikai.



Misis Parkop toktok wantaim sik man long TB wod.



Misis Parkop karim ol presen na kaikai i go insait long TB wod long 3mail haus sik. Ol foto: Nicky Bernard

G4S wokman i no kisim Krismas pe

LONG taim bilong Krismas na Nu Yia, planti wokman bilong ol kampani insait long kantri i save kisim bonus pe long wanem, ol i bai stap long hoholide, na ol i no inap go long wok.

Taim ol i stap long hoholide bilong ol, ol bai i nidim mani long baim ol samting bilong famili, baim kaikai, na tu, ol samting bilong amamas long taim bilong Krismas na Nu Yia.

Planti bilong ol Papua Niugini G4S wok manmeri i autim wari bilong ol na tok ol i no amamas. Planti wokman bilong G4S husat i save wok long

Manus Ditensen Senta, i lusim wok ples bilong ol long Manus na go bek long ol wan wan ples, na i no bin kisim Krismas pe, na ol i wanbel long dispela.

Ol dispela wokman husat i les long Wantok Niuspepa kolim nem bilong ol, i tok olsem, bipo long ol i bin go wok long Manus Ditensen Senta, G4S kampani i bin givim agrimen pepa long wan wan bilong ol long sainim, tasol ol i no bin givim taim long ol long ritim gut dispela agrimen.

Bikpela laikim bilong ol dispela G4S wok manmeri nau, em long kampani yet

i kisim dispela agrimen i kam bek long ol na bai ol i ritim na sainim gen.

Wanpela bilong ol dispela wokman bilong G4S i tok olsem em i lukim ol G4S wok manmeri bilong Australia i kisim Krismas pe na amamas, na em i laik save long wanem as tru, na kampani i no luk-save long ol Papua Niugini G4S wokman.

“Mipela ol PNG G4S wokman i save mekim bikpela wok tru long lukautim ol Asailam Sika long Manus, na dispela pasin ol i wokim long mipela i no stret long ai bilong mipela,” wanpela G4S wokman i tok.

PNG Pawa apim prais bilong pawa

Stanley Nondol i raitim

PNG Pawa i apim prais bilong baim pawa long nu yia. Ol kastoma bai baim moa mna kisim liklik pawa saplai.

PNG Pawa Limited i tokaut long dispela bihain long independen Konsuma na Kompetisen Komisnin (ICCC) i givim tok orait long apim pawa tariff o takis long 5.9 pesen. Dispela bai stat long Jenueri 1, 2014.

Dispela bai lukim olupela Easipe reit bilong pawa bin stap long 0.6986/kwh i senis na nupela reit em i stap long 0.7379/kwh.

Pastaim ol kastoma i save baim K15 long kisim easipe.

Nau ol bai baim K15 wantaim takis bilong 5.9 pesen. Em klostu long 90t moa kastoma bai pbaim antap long K15.

PNG Pawai tok long K15, K1.50t em bilong gavman takis na kastoma bai kisim yunit long K13.50. Tasol 5.9 pesen i kam insait long putim moa hevi long kastoma baim 90t moa long kisim wankain yunit bilong K15.

Pastaim reit kastoma save baim K15 na kisim 19.37 yunit bilong pawa. Long nupela reit kastoma bai kisim 18.3 yunit bilong pawa long K15.

PNG Pawa i tok dispela senis i kamap bihain long yia rivyu we save kamap long wan wan yia long save gut long prais bilong

fuel o disil, oil, petrol na ol arapela we PNG Pawa save yusim long ol masin long givim pawa saplai.

Dispela rivyu i kiamap aninit long ilektrisiti kontrak lo. Dispela kontrak i kam aninit long lo bilong kantri na bungim wok bilong ICCCL na PNG Pawa Limited (PPL).

PNG Pawa i tok em i no save kisim strong long gavman baset long ranim pawa na tariff o takis em wanpela bikpela rot we PNG Pawa i save mekim mani na givim pawa sevis.

Dispela nupela takis em bai helpim PNG Pawa long mekim mani na stretim ol masin na apim pawa saplai i go long ol kastoma.

Wol wo 2 man, Ben Moide i dai

BEN Moide man i bin pait hat long nem bilong kantri, Papua Niugini iong taim bilong Wol Wa 2 i dai long Pot Mosbi long Mande, Decemba 30 long 11 kilok.

Mista Moide i bin memba bilong Pasifik Ailen Batalien. Em bin pait hat long Wol Wo 2. Em i bin wok aninit long Australia gavman long dispela taim na i sanap strong long winim pait agensim Japan long noken winim Australia

na kisim PNG. Dispela taim bikipela gan pait i kamap long Kokoda wantaim ol soldia bilong Japan. Papamama bilong Mista Moide tupela bilong Pari long Sentral provins na Seduame long Westen provins. Mista Moide i dai long Gerehu haus sik. Pikinini bilong em John Ben Moide i tok papa bilong em i bungim sampela hevi long kisim win na ol kisim em i go haus sik

tasol em i lusim laip bihain long ol haus sik laik i wok long sekim em. John Mode i tok papa bilong em i gat nem long kantri na olgeta man bai sori long I dai bilong em tasol em i lusim han mak bilong gutpela wok em i tingim kantri na i mekim. Mista Ben Moide i gat planti gutpela stori long wok bilong em i stap. Tok save long haus kra i bai kamap bihain.

Lapun Ben Moide long Rimembrens de long las yia 2013.



Gavana pasim olgeta buai maket long NCD

I kam long pes 1

Mista Parkop i tok em i gat bikipela bilip nau olsem ol lain bilong salim buai bai i stop olgeta long baim buai long ol lain i kam insait bilong wanem bikipela saplai i save kam long Hiritano Haiwe, olsem na bikipela rot blok bai i stap long kona bilong Laloki bris long sait bilong NCD. Em i tok pastaim em i givim sans long ol lain bilong kaikai buai long lukautim rabis bilong ol long dispela tripela mun i go pinis tasol em i lukim olsem, ol dispela lain i hambak yet na bagarapim ol pablik ples. Olsem na, sori tru dispela tambu bai i kamap strong moa nau stat long Janueri 1.

Long wankain taim, Gavana Parkop i tok bikipela tenkyu na amamas i go long ol lain bilong siti husat i bihainim toktok bilong tambu na ol i helpim long lukautim pipia bilong ol na i mekim siti i luk nais moa long dispela tripela mun i go pinis. Tasol em i tok moa olsem, ating long nupela yia, sampela lain bilong kaikai buai tumas i ken mekim 'niu yia promis' bilong ol long stopim buai.

"Sapos ol lain i stop long kaikai buai, ol i no inap tru long dai. I no olsem bai ol i kisim wanpela sik nogut na ol i dai, nogat. Ating moa gut em ol bai stap helti na laip bilong ol bai i stap longpela taim moa long graun," Mista Parkop i tok.

"Mi no stopim yu long kaikai buai. Sapos yu laik kaikai buai, yu ken kisim liklik limlimbur i go aut long Laloki buai ritel maket o go olgeta long Ruburogo holtsel na baim buai bilong yu, kaikai na yu ken kam bek," em i tok.

Mista Parkop i tok long kamapim maket long Sentral Provins tu bai kamapim sampela we bilong moa pipel long siti i ken raun lukluk long hap na bringim bisnis na senis i go klostu long ol pipel bilong Sentral Provins.

Em i tok moa olsem bai i gat pawa lain i go olgeta long Ruburogo. I gat ples bilong waswas, toilet na bai i gat wanpela stua bilong salim ol kaikai samting tu i stap long hap. Em i gutpela hap long ol lain long siti i ken go raun liklik na baim buai bilong ol na kam bek.

Lo bilong wan wan man i baim 2 kilogrem buai em i stap yet. Tasol Gavana i givim tok lukaut olsem, sapos ol man long siti i laik soim stail na pulimapim wanpela PMV na olgeta i go baim wan wan 2 kilogrem buai, ating NCD bai i gat planti tingting long dispela kain pasin. Nogut ol i giaman pasim tok na kam bek long siti long salim gen.

Mista Parkop i tok moa olsem ol praivet ka i ken go baim buai bilong ol na ol polis na siti rensa bai i no nap long sekim ol tumas, tasol sapos ol i holim wanpela o tupela i haitim buai bilong salim na i kam insait long siti, dispela nau bai mekim ol long sekim olgeta ka. Em i tok, NCD i no laik long holim trefik long rot olsem na ol bai sekim tasol ol bikipela PMV trak na ol bas.

Em i tok tenkyu tu long Gavana bilong Sentral Provins, Kila Haoda na Gavana bilong Galp, Havila Kavo long wok wanbel bilong tupela long dispela. Em i luksave olsem dispela buai tambu em i gat bikipela mining long ol ples lain bilong dispela tupela provins, bilong wanem ol i save stap long mani bilong buai na mekim planti wok long dispela. Olsem na em i gat bikipela luksave long tupela gavana na ol pipel bilong tupela.

Gavana i singaut long ol pipel long NCD long no ken traim long sakim dispela tambu, bilong wanem em i no hat long ol i go long Laloki o Ruburogo long baim buai bilong ol na kaikai.

"Em i isi. I no olsem mi askim ol long go antap long Maun Everes o Maun Wilhelm long go kaikai buai. Olsem na ol i mas lukim olsem em i gutpela long yumi givim gutpela nem long siti bilong yumi olsem em i namba wan siti long Pasifik," Gavana i tok.

Gavana i tok, NCD nau i pinisim ol siti rensa tasol bai ol i kisim 50 long wok wantaim polis long dispela taim long lukautim kona bilong Laloki bris, ol raun about bilong siti na long hap bilong ol trefik lait. Em ol hap we bai ol i sekim ol man i spetim buai, tromoi pipia na tu long ol trak na bas long karim buai i kam insait.

Make your Christmas wish come true...

Feast

Holiday

Gifts

...with a BSP Personal Loan

Home Theatre

New Laptop

- ✓ Fast Loan Approval
- ✓ Flexible Repayment Terms
- ✓ Competitive Interest Rate

320 1212 / 7030 1212 - 24/7
 servicebsp@bsp.com.pg
 www.bsp.com.pg



Papamama graun i laikim pemen

Ol papa na mama bilong graun we Angoram taun i stap long em i autim bel hevi bilong ol long pasin ol woklain bilong Lens Dipatmen i mekim long stretim rot bilong pe long graun bilong ol.

“Mipela ol papagraun na mama-graun bilong Angoram Taun long Angoram Distrik, Is Sepik Provins i no amamas long pasin ol wok manmeri insait long Lens Dipatmen long Waigani i mekim long mipela,” Valentin Manau, mausman bilong ol papamama graun i tok.

Em i tok ol wok manmeri long opis bilong Lens Dipatmen i no helpim ol long stretim pepa wok bi-

long bihainim disisen bilong Lans Taitol Komisnin (NLTC) ol i bin wokim long 20 Julai 2000 long Wewak, Is Sepik.

Kot disisen i tok long setelmen pemen oda i go long gavman long baim ol papamama graun K950,000 tasol. Ol lain lida manmeri i makim tripela ples em Maria Tan (Waliawi) bilong Mansep (Gasina Klen), Raphael Digi bilong Gawien (Longumi klen) na Moses Gawi bilng Mamber (Oro Klen) insait long Marienberg Lokol Level Gavman.

Long Trinde 29 De bilong Me 2013, ol i givim setelmen oda

pemen i go long Lens opis bilong stretim pepa wok na mekim pemen. Opisa i wok long dispela (mipela haitim nem) i tokim mipela olsem bai Lens i mekim pemen pepa wok long redim pemen olsem kot oda i makim pinis. I gat narapela opisa tu i bin tokim ol long helpim ol tu.

Ol i wet longpela taim long pemen na ol i no lukim i kamap, olsem na ol i go long Lens Opis na sekim klostu olgeta wik long mun Me i go inap Oktoba 2013.

Mista Manau i tok, long de 15 bilong Oktoba, pepa wok i bin stap wantaim seketeri bilong Lens long sainim tok orait bilong mekim

pemen. Tasol dispela em i no bin kamap na ol papamama graun bilong Angoram Taun i go i kam yet na ol i bel hevi long kain pasin.

“Long Fonde 5 Disemba mipela i go long lukim Seketeri na ol opisa bilong em stret i wok insait long opis bilong em. Tasol ol i tokim mipela olsem mipela i no inap long lukim Seketeri bikos no gat toksave o apoinmen wantaim em. Dispela em i no tru, mipela i bin mekim apoinmen olsem toksave i kam bek long mipela long lukim seketeri long 10 klok moning taim long toktok wantaim em stret. Mipela lusim opis wantaim bikpela wari tru na i

no amamas olgeta long kain pasin bilong Seketeri wantaim ol opisa bilong em long Lens Dipatmen i mekim long mipela,” Mista Manau i tok.

“Mipela i no wari long dispela, bilong wanem, mipela i holim olgeta mak bilong toktok bilong ol opisa i stap long notbuk bilong mipela. Olsem na mipela i tokim Lens Seketeri, wantaim tupela opisa bilong em long kamaut stret na toktru long mipela papamama graun long wanem as seketeri i no bin sainim na tok orait long dispela setelmen oda bilong pemen bilong mipela,” em i tok.

Tupela bris long Madang-Lae haiwe i orait bipo long Krismas

JAMES G. KILA i raitim

OL KAR na pipel husat i yusim Madang-Lae Haiwe i bin kisim gutpela Krismas na Nu Yia presen bihain long ol wokman bilong Woks Dipatmen i stretim tupela bris we wara i bin bagarapim.

Dispela tupela bris em Mia klostu long Waput na Usino mausrot na Bora we i stap tri kilomita long Ramu Suga taun long Gusap.

Ol manmeri na bisnis long Madang i bin pret na wari tru bihain long bris long Bora i bin bungim hevi long stat bilong mun Desemba bihain long tait wara i rausim ol sapot aninit long tupela sait bilong bris.

Planti i wari bikos ol i ting bagarap bilong bris bai mekim Krismas na Nu Yia

selebresen bilong ol i no kamap gut.

Pastaim long Krismas, planti manmeri na ol PMV bas na bikpela trak i bin kisim taim stret bihain long bikpela ren i kamapim tait na bagarapim pos bilong Bora bris. Long mun Ogas 2013, wanpela bikpela kar we i karim bikpela masin i mekim Mia bris long Waput i pundaun na givim hevi long ran bilong ol kar, trak na ol pipel i yusim rot.

Ol polis bilong Ramu Suga, husat i sanap olsem sekuriti long pablik long taim hevi i kamap long Bora bris i tok ol lain ensinia bilong Woks Dipatmen bilong Lae i wok strong tru na stretim gen Bora bris pastaim long Krismas na Nu Yia. Dispela i mekim trefik i ran i go kam

na ol pipel i ken go amamas wantaim ol famili bilong ol. Moa long en tu, ol bikpela bisnis i ken kisim bel isi bikos ol bikpela saplai bilong ol long Lae i ken go long ol.

Sift supavaisa wantaim Ramu Suga polis stesin, Senia Konstabel, Kenneth Huya i tok ol pipel wantaim ol kar na trak i luksave long hevi blong Bora bris taim wara i wasim tupela simen i holim strong bris na bris i slip sait. Dispela birua i mekim Woks Dipatmen i stapim ol kar long yusim bris inap taim ol wokman olsem ol ensinia i stretim bris gen.

Senia Konstabel Huya i tok ol lain bilong Woks Dipatmen i mekim gutpela wok na bris i orait pinis na ol kar i stat long ran antap long en bipo long Krismas na Nu Yia.



Ol manmeri i wokabaut katim wara Bora bipo long Krismas, tasol nau bris i orait pinis. Foto: James G. Kila

Krismas Laits long Manus Ailan



Ol manmeri bilong Lorengau i amamas long lukim Krismas laits i kamap long ol

LONG Pot Mosbi, Krismas Lait i no wanpela nupela samting, na i save kamap long olgeta Krismas taim long Jack Pidik Park. Tasol long Lorengau long Manus Ailan, Krismas Laits i bin kamap na ol manmeri long ap i lukim na amamas.

Man husat i go pas yet long mekim kamap Krismas Laits long Lorengau, em Gavana bilong Nesenel Kapital Distrik (NCD) Powes Parkop, sem man husat i kamap wantaim dispela tingting bilong Krismas Laits long Pot Mosbi.

Gavana Parkop yet i bin karim ol lait wantaim em taim em i go long Manus, na wantaim helpim bilong Lorengau taun Meya, Ruth Mandrakamu, ol i putim laits long NBC Park long Lorengau.

Gavana Parkop tokim ol manmeri long Lorengau olsem taim

em na Praim Minista Peter O Neill i bin kam long Manus long sampela taim i go pinis, ol i bin tokim ol manmeri bilong Manus olsem bai ol i mekim Krismas Laits. Long dispela as, Gavana Parkop i no bin laik giaman long toktok bilong en, na em i karim laits i kam.

Em i namba wan taim bilong ol manmeri long Manus Ailan long lukim dispela kain Krismas Laits progrem, na planti bilong ol i bin amamas tru.

Gavana Parkop tok dispela donesen bilong Krismas Laits em i liklik samting, tasol em i gat strongpela tingting olsem dispela Krismas laits bai i wokim ol gutpela senis long Krismas long Manus Ailan.

“Taim mi bin kamap Gavana bilong NCD long 2008, mi bin lukim olsem long taim bilong Krismas, ol

manmeri bilong Pot Mosbi i save pret long raun long nait long wanem, ol i save pret long ol raskol.

“Tasol long nau, dispela Krismas laits progrem long Pot Mosbi i mekim ol manmeri bilong Siti i kam aut na amamasim Krismas olsem wanpela bikpela komyuniti na famili.”

“Mi laikim Lorengau long kamap olsem, long wanem, em bai i putim stop long ol kain kain raskol pasin.” Gavana Parkop i tok.

Meya Mandrakamu i tok tenk yu long Gavana Parkop. Em i tok ol manmeri bilong Manus i pilim spirit bilong Krismas taim ol dispela Krismas Laits i kamap.

Bikpela toksave em mekim i go long ol pipel bilong Manus, em long lukautim ol dispela lait, long wanem, ol i bai helpim yumi long planti we.

PNG i hatpela kantri long polis long kontrolim

Kolopu Waima i raitim

Papua Niugini em i wanpela kantri we ol polis i bungim ol planti salens bilong kontrolim tasol ol i kontrolim.

Polis Kominisa, Toami Kulunga, i mekim dispela toktok long Polis Komisina 2013 Pinis bilong Yia Peradlong Mosbi.

Papua Niugini i gat moa long 5,000 polisman na meri we em i liklik numba tumas long kontrolim ol manmeri long kantri.

Papua Niugini i gat moa long 7 millen populesen na wanpela polisman o meri i save kontrolim 1, 440 manmeri. Yunaited Nesens i tok mak bilong ol polisman na meri long kontrolim ol manmeri em wanpela polisman bai inap long kontrolim 450 pipel.

Mista Kulunga i tok nau traim tingim 810 wanwan tokplesinsait long kantri, na yu traim tingim ol polis save kontrolim ol. "Em i tru dispela i wanpela salensnahatpela long ol polis long kontrolim," Mista Kulunga i tok.

Em i tok yumi save harim planti ol nogut stori long wok bilong ol polis insait long kantri.

Tasol long ol dispela ol nogut stori, i gat ol planti gutpela stori i stap. Tasol, trupela tok em ol gutpela stori em i no nius na nogut stori em nius olsem na em i save mekim hetlain long olgeta midia long kantri na ausait tu.

Mista Kulunga tok i gat planti ol dediketed polisman na meri i mekim gut wok bi-

long ol long olgeta hap kona bilong kantri we i nogat ol planti ol risos long sapotim ol.

"Mipela i givim sampela level bilong polising sevis insait long olgeta hap long kantri. Mipela arestim ol lain, sasim ol nakonviktim ol raskol. Yu traim na go sek long ol haus kalabus na tok ol polis i wok o nogat.

Olgeta kalabus long polis stesin i pulapna planti ol bikpela haus kalabus long kantri i nogat spes long kisim moa raskol," Mista Kulunga i tok.

Em i tok, las yia (2013), em i preperesen yia bilong Royal PNG Konstabulari. "Mipela i kam aut long politikaimpas, nesenele ilekesen, no gat inap manina risos. Dispela yia (2014), mipela bai stat karim aut planti ol gavman dairektiv long polising, administratif na operesenel wok.

Gavaman i komitit K276 milen bilong RPNGC modenaisesen program ova faiv yia.

Dispela yia gavman i givim K56 milen na ol dispela manii bin putim long modesnaisesen program we Prait Minister Peter O'Neill i opim long namba foa mun las yia.

"Menesmen bilongmi nau putim planti toktok long risos na strongim fes ples polising. Dispela em i wanpela impoten eria bilong RPNGC we ol i bin lus tingting.

Mipela i bin lukluk long ol spesolisbrens bilong konstabulari long taim yet bilong publiksefiti. Dispela bai senis aninit long menesmen bilong mi," Mista Kulunga i tok.

Polis long NCD mekim gutpela wok long Krismas

OL polis long NCD i kisim luksave long Gavana Powes Parkop long gutpela wok ol i mekim long taim malolo bilong Krismas na Nu Yia.

Gavana Parkop i givim dispela toktok bilong luksave long taim em i holim nius konprens bilong pasim buai long NCD long Tunde dispela wik. Metropolitan Suprintenden bilong NCD na Sentral Koman, Andy Bawa i bin stap long dispela nius konprens, olsem na Gavana Parkop i tok tenkyu na amamas long em. Mista Parkop i tok em i amamas tru long gavman i luksave long gutpela wok bilong Andy Bawa na putim em bek gen olsem Metropolitan Suprintenden bilong NCD na Sentral.

Mista Parkop i tok, i no bin gat planti hevi na bagarap i kamap long pasin bilong dring bia na kros pait i kamap. Em i tok amamas tu long olgeta lain insait long siti long ol i stap isi long ol eria bilong ol na i no givim

POLIS bilong Nesenele Kapital Distrik tok tenkyu long ol manmeri long siti long selebretim Krismas gut.

Asisten polis Komisina na Komanda bilong NCD na Sentral, Jim Anderws, i tok ol i rekotim 7-pela insiden na arestim 20 pipel husat i brukim lo.

Moa long 500 polisman na meri i wok long taim bilong Krismas long NCD na Sentrol provins.



Metropolitan Suprintenden bilong NCD na Sentral Koman, Andy Bawa.

hatwok tumas long ol polis na ples i stap gut.

"Ol pipel i soim tru olsem ol inap long lukautim Pot Mosbi siti olsem wanpela gutpela, namba wan siti bilong Papua Niugini na naispela tru long Pasifik. Mi tok tenkyu tru long ol na tu ol lain bilong kaikai buai tu i winim tingting bilong mi long pasin ol i mekim long lukautim ol spet na rabis bilong

ol," Mista Parkop i tok.

"Mipela i bin kisim ol Siti Rensa long las tripela mun long traim long daunim pasin bilong tromoi rabis na bagarapim ples tasol ol lain bilong salim buai na kaikai buai i no wok gut wantaim ol, olsem na nau mipela i pasim olgeta." Em i tok.

Long wankain taim, Met. Supt. Andy Bawa i tok em i wanbel tru wantaim toktok bilong ol.

"Mi tok tenkyu long jeneral pablik long sapot na wok bung wantaim. Ol pablik i stap long wan wan haus nabanis bilong ol na selebratim krismas," Mista Andrews i tok.

Mista Andrews i tenk yu long ol polis opisa aninit long lidasip bilong Metropolitan Suprintenden Andy Bawana Suprintenden bilong Pablik Sefti, Perou Ndranou, long gutpela wok

bilong Gavana na wok em i mekim long tambuim buai long siti. Em i tok dispela bai helpim long kamapim gutpela lukluk bilong siti long redi long ol bikpela kibung bai i kamap olsem; Melanesian Arts Festival long 2014, Pasifik Gems long 2015 nad APEC miting long 2018.

"Em i gutpela stat bilong redi long ol dispela bikpela taim. Olgeta polis opisa long siti bai helpim Gavana long strongim tambu bilong buai. Mi makim ol polis opisa, na mi laik tok tenkyu tru long olgeta lain insait long siti long stap isi na selebretim krismas gut insait long siti. Em i olsem gutpela krismas presen ol i givim long siti," Mista Bawa i tok.

"Yumi inap long mekim siti i kamap gut. Em i nupela yia, na nupela stat. Sapos mipela i bin mekim nogut long 2013, mipela i laik mekim gutpela wok moa long 2014. Mi tenkyu long ol nius lain tu long sapotim ol polis wantaim ol wok bilong yupela," Mista Bawa i tok.

Wankain taim, Bawa itok 114 ol liklik ofensna ol i bin arestim 20 man long krismas. Planti bilong ol em long dring na pait long strit.

Mista Bawai tok moa long 100 spak man, ol i kisim long ol strit na putim long rumgat long krismas taim em ol i rausim go tasol sampela i pait egensim ol polis i stap yet.

Polis tok tenkyu long ol manmeri

Andra Ailan kisim ol musik samting long Parkop

OL manmeri bilong Andra Ailan long Manus Province i bin kisim Krismas presen bilong ol taim Gavana bilong Nesenele Kapital Distrik (NCD) Powes Parkop i bung wantaim ol long Sande.

Gavana Parkop i go long Andra Ailan wantaim meri bilong em Jean, na wanpela deligesen. Na ol manmeri bilong Andra Ailan i mekim Manus danis bilong ol long soim amamas long ol.

Gavana Parkop tok dispela ol musik instramen em bilong givim long i go long Andra Komyuniti long Pot Mosbi long sapotim musik long sios, tasol bihain ol Andra Komyuniti long Pot Mosbi i tok long givim i go long ol manmeri long ples.

Taim Andra Komyuniti long Pot Mosbi i harim olsem Mista Parkop bai i go long Manus long amamasim Krismas Lait progrem long Lorengau, ol i givim ol musik instramen long Parkop long karim i go na givim long ol manmeri long ples.

Mista Parkop i tok tu olsem em i amamas long dispela long wanem,

em i save sapotim wok bilong yut na sios.

Taim Gavana Parkop i bin toktok long ol manmeri bilong Andra Ailan, em i bin tokim ol olsem planti yangpela manmeri i save go long Mosbi na painim wok long hap, na ol i no save helpim provins long develop. Em tokim ol long stap na wok insait long provins long wanem, sapos olgeta i go long Mosbi, husat bai i stap bek long ples na helpim ples long develop.

Bikpela tingting bilong Gavana Parkop em long strongim gutpela sios laip long ples, na musik em i wanpela bikpela samting long sios. "Sios laip wantaim musik i ken senisim ol rabis pasin bilong ol yut long ples, na bai ol i kamap ol gutpela lida bilong taim bihain." Parkop i tok.

Wanpela samting we Gavana Parkop i lukim na amamas, em long ples i klin. Em i tokim ol manmeri bilong Andra long no ken lusim dispela gutpela pasin bilong klinim ples long wanem, yumi nidim klin-



pela ples long stap gut na develop. Taim Parkop i pinisim ol tok tok bilong en, ol manmeri bilong Andra

Ailan i givim ol presen olsem neklles na Manus basket i go long em, meri bilong em na deligesen.

NCD Gavana Powes Parkop na meri bilong em Jean i givim ol musik instramen i go long ol komyuniti lida bilong Andra Ailan.

Tisa i no stap long klasrum i gat bikpela wari

Kolopu Waima i raitim
OL tisa i lusim klasrum na i no skulim ol pikinini i kamap wanpela bikpela wari long kantri.

Ol tisa i save mekim bikpela wok long edukesen bilong ol pikinini, long skulim ol we i developim na apim save na kliarim lainim long

kisim gutpela laip. Moa long 1.3 millen pikinini i stap insait long edukesen sistem na ol i stap long hap bilong ol tisa. Ol pikinini bai lainim long ol tisa, na ol tisa i mas stap olgeta taim long klasrum.

Siaman bilong Papua Niugini Tising Sevis Komisen, BaranSori, i tok sampela tisa

i no save givim taim bilong ol gut long skulim ol pikinini. Ol i no save stap gut long skul na respektim ol yet olsem ol i tisa. Ol i save lusim ol pikinini stap nating long klasrum naol i save go raun.

Mista Sori i tok, pasin bilong lusim ol pikinini long klasrum i kamap wanpela bikpela wari we i pasim ol

sumatin long rait long kisim kwaliti edukesen.

Em i tok kain taim olsem long krismas na nu yia, em i taim bilong ol tisa long lukluk bek long wok bilong ol na mekim plen bilong kamap gutpela tisa longs 2014.

Mista Sori i tok 2013 em i yia bilong mekim wok long ol plen gavman i gat long en, ol

program naektiviti aninit long O'Neill Dion gavman. Skul fi fri polisi i olsem wanpela plen we bai staim ol long kisim "olgeta pikinini bai kisim edukesen!" i putim bikpela wok presa long ol tisa we i lukim planti sumatin i kam skul na samting bilong lainim ol, olsem teks buk na ol narapela risos i sot.

Tasol maski ol tisa i gat ol hevi, ol i go het long skulim ol pikinini long givim kwaliti edukesen.

"Mi laik tokaut olsem O'Neill Dion gavman i luk-save long wok bilong ol tisa. Gavman nau i tok orait long apim penaalawens bilong ol tisa na ol bai kisim stat long Januəri namba 1 2014," Mista Sori i tok.

Skulim ol pikinini taim ol i liklik yet

Kolopu Waima i raitim

NAMBA wan samting long statim skul em long Elementeri level. Elementeri em i faundesen bilong edukesen.

Na ol pikinini i mas statim gut edukesen bilong ol long elementeri.

Planti ol pikinini bilong Papua Niugini i save stap long ples, na ol i no save gut long edukesen, minim olsem, ol i no save long rit na rait.

Olsem na taim ol i go long skul, ol i mas lainim ol nupela samting na i no tokples.

Sistem bilong Autkam Bes Edukesen (OBE) long skulim ol pikinini long tok ples long elementeri level i no go gut. Ol pikinini i stap tupela

yia long elementeri, lainim tok ples gen, ol no lainim wanpela nupela samting.

Taim ol i go mekim gret 3, olgeta samting i narakain. Tok ples i senis i go long Inglis. Na ol i painim hat long lainim ol samting long tok Inglis. Inglis bilong ol tu in no gutpela. Dispela i bagarapim edukesen bilong pikinini.

Nau gavman bilong O'Neill Dion, i mekim disisen olsem olgeta elementeri skul pikinini bai lainim Inglis. Inglis em i wanpela faundesen bilong edukesen tu bikos olgeta samting i stap long buk we ol pikinini bai lainim long inglis.

Stat long neks yia, olgeta pikinini bai lainim

Inglis. Ol tisa husat bai skulim ol pikinini bai kisim treninig long kisim pepa. Ol man i gat gutpela save na skul man bai skulim ol pikinini long elementeri.

Olsem na lainim ol pikinini long rit na rait taim ol i liklik yet i gutpela.

Buk bilong Pikinini laibreri, wanpela non-gavman organaisesen, i save kisim ol pikinini husat i stap nating long haus o long stret na lainim ol long rit na rait. Dispela organaisesen i lainim ol 4 krismas pikinini. Nau ol i kamapim wanpela nupela program. I gat 3-pela sesen we ol pikinini ken go na lainim, na dispela em I fri, ol papa-

mama bai no inap baim wanpela fi. Long early bird program, stat long 8 klok na go 10 klok, em bilong ol pikinini husat gat krismas namel long 4 na 5. Riding developmen grup em bilong ol pikinini krismas bilong ol namel long 5 na 6 na riding skills em bilong ol bikpela pikinini krismas bilong ol i 6 na husat i stap long skul.

Eksekutiv opisa bilong Buk Bilong Pikinini, Joanne Grenenger i tok, "Ol pikinini i lainim gut long rit na rait. Ol i ridim-buk long Inglis na lainim long skul bilong ol i kam orait. Buk Bilong Pikinini i gat ol sotpela kos tu we ol pikinini i strongim laik long stap i go long pinis bilong sesen."

Fri edukesen mani lus

FRI edukesen mani bilong Rai Kos sekenderi skul, pastim Rai Kos hia skul, long Madang provins i lus. I no gat wanpela sain tu em i stap.

Hetmasta bilong skul, Ernest Saweang i givim dispela ripot long taim bilong skul greduesen long Desemba 11. Memba James Gau, Madang Provinsal Edukesen advaisa Moses Sariki, Siaman bilong Bod ov Dairekta Nionio Keluo, ol papa-mama na ol narapela man tu i bin stap long taim Mista Sakiri i givim dispela ripot.

Em i tok mani bilong skul ol i putim long akaun bilong Transgogol Hai skul na i no long Rai Kos sekenderi skul benk akaun.

Mista Sariki i tok fes-

peimen ol i putim long akaun bilong Transgogol hai skul na ol i no salim i kam long akaun bilong Rai Kos skul akaun. Tasol skul i stap long sapot bilong Madang Provinsal Gavman na ol narapela stakeholder.

Bihain em i tok K113, 700 bilong fes pemen em go insait long akaun bilong Transgogol hai skul, ol i putim kam bek long akaun bilong Rai Kos sekenderi skul. Tasol mani i no stap long operating akaun na em i lus nogat luksave i kam nau.

"Benk statmen bilong Transgogol Hai skul i soim olsem ol i salim i kam gen long Rai Kos sekenderi skul tasol tru tru, mani i no stap long akaun," Mista Sariki i tok.

Mista Saweang i tok skul i no bin putim sam-pela nupela projek long dispela yia na operet long strik baset na long liklik mani ol Madang Provinsal Gavman i givim, na skul fi ol i kisim long ol sumatin.

Mista Gau i tokim skul long kisim dispela mani long wanem em i rong bilong skul edministresen. Tasol Hetmasta tok klia olsem K 232 650 bilong seken pemen bilong gavman subsidi ol bin putim long Rai Kos skul akaun na ol i kisim.

Em i tok moa olsem ol gret 11 bai wokim gret 12 neks yia long sem skul. Rai Kos hai skul i kamap wanpela sekenderi skul long Desemba 11 2013 na em i namba 5 sekenderi skul long Madang bihain long Tusbab, Malala, Karkar na Brahman.

Stia toktok bilong helpim ol skul studen

Edukesen em i as bilong gutpela sindaun long laip bilong yu long bihain taim.

Bosman bilong Intenesenel Trening Institut long Is Nu Briten, Michael Novingu mekim dispela toktok long gret 8 greduesen bilong St. Mathias Tatavul komyuniti skul.

Mista Novingu i tok edukesen tasol bai kamapim gutpela sindaun long bihain taim. Em i tok, sapos i no gat gutepla edukesen, bai sindaun bilong man o meri bai bagarap long bihain taim.

Em i tokim ol 46 sumatin husat i pinisim gret 8, long wokim plen bilong ol, karimaut na bihainim bai ol i kamap long mak ol i sut long en. Moa yet, em i tok sapos i no gat gutpela plen bai ol i no inap long winim mak.

Novingu i tok, "Yupela em ol lida manmeri bilong bihain taim long dispela kantr. Yupela i wok strong na kisim gutpela edukesen bai helpim yupela long apim

ikonomi o wok bisnis bilong dispela kantri."

Long wankain taim het tisa long St. Mathias Tatavul komyuniti skul, Zachary Klikra i singaut i go long ol papamama long wok bung wantaim long kirapim skul i go het.

Klikra i tok long 2014 bai ol i no inap lainim ol pikinini long (OBE) Autkam Bes Edukesen. Em i tok bai ol i go bek long olupela sistem na lainim ol pikinini. Em i tok skul bai i go antap long level 5.

Na em i singaut long ol papamama long baim hariap ol dinau bilong ol long ol project fi bilong 2014.

Em i tok bai ol i wokim tupela haus skul, haus slip bilong tupela tisa, toilet na haus buk bilong ol sumatin.

Klikra i tok disiplin bilong ol sumatin long skul i pundaun. Em i tokim ol papamama long lanim ol pikinini bilong ol long gutpela pasin long ol pastaim long ol i kam long skul. Em i tok dispela bai

helpim long stapim ol bikhet na hambak pasin i kamap long skul.

Long wankain taim, wod kaunsila Michael Guata tokim ol papamama olsem gavman bai putim lo olsem sapos papamama i no salim pikinini i go long skul long 2014, bai ol i gat kot.

Guata i tok gavman i baim skul fi bilong ol pikinini na olgeta pikinini mas go long skul.

Em i tok husat papamama i no salim pikinini bilong ol i go long skul, bai polis i mekim save long ol.

Em i tok, wok bilong lainim ol pikinini i no wok bilong ol tisa tasol, nogat. Em i wok bilong ol papamama long lainim ol pastaim long haus bihain ol bai go long skul bai tisa i lainim ol.

Guata i singaut i go long ol papamama long wokbung wantaim ol tisa long skul long ranim skul bai kamap gut long helpim ol pikinini long kisim gutpela save.

Fact about eggs

- Eggs are naturally high in protein.
- Eggs have less than 2 grams saturated fat.
- Eggs are source of 11 vitamins and Minerals.
- They are a good source of vitamin B12 which may be lacking in vegetarian diets.
- Eggs are a source of Iron.
- Eggs are an ideal food alternative to meat.
- Eggs are very economical and highly nutritious.

100% PANG MADE
BAIM PNG MADE NA KAMAPIM MOA WOK

NDA laikim Dokta Mokela i kam bek

DOKTA David Mokela, i lusim wok pinis olsem Dairekta bilong Medikal Sevis long Pot Mosbi Jeneral Haus Sik long mun Desember, tasol Presiden bilong Nesenal Dokta Asosiesen, James Naipao i laikim haus sik i mas kisim em i go bek long wok bilong em.

Dokta James Naipao, long wanpela pas i go long Sif Eksekutiv

Opisa (CEO) bilong Pot Mosbi Jeneral Haus Sik, Grant Muddle, long Disemba 16, 2013, i tok long no ken wanbel long Dokta Mokela i risain. Na em i tok strong long Mista Muddle i mas putim Dokta Mokela bek long wok long 72 awa tasol.

Insait long dispela pas, Dokta Naipao i tok ol memba bilong NDA i bin harim olsem Mista Muddle, i bin pasim dua strong long ai bilong

Dokta Mokela na long dispela, Dokta Mokela i givim pas bilong risain o lusim wok olsem Dairekta bilong Medikal Sevis long bikpela haus sik bilong kantri.

Dokta Naipao i tok, Dokta Mokela em i wanpela sinia medikal opisa na tu em i memba bilong Nesenal Dokta Asosiesen. Pastaim long ol i makim em olsem Dairekta bilong Medikal Sevis, em i bin Sif Pidiarisen long PNG, o nambawan

dokta bilong ol pikinini.

"Mipela i kirap no gut long em i lusim wok na dispela i givim mipela planti tingting long wanem kain wok nau dispela bod bilong haus sik wantaim sif eksekutiv opisa i wok long ranim dispela haus sik. Tingting gut! Pot Mosbi Jeneral Haus Sik i no wanpela hotel o kasino," Dokta Naipao i tok.

"Sapos sif eksekutiv opisa bilong haus sik i pasim dua strong long

pes bilong dairekta bilong medikal sevis, em i soim olsem CEO i no gat rispek long Dokta Mokela na ol medikal opisa i wok aninit long em. Mipela i ting i mas i gat sampela hait tingting i stap long dispela pasin," em i tok.

Presiden bilong NDA i tok moa olsem, Bod bilong Pot Mosbi Jeneral Haus Sik i mas mekim samting hariap long stretim dispela hevi.

Ol kalabus man i kisim skul long TB/HIV

SIK TB i no save kamapim HIV na AIDS, tasol ol lain i gat HIV na AIDS i ken kisim sik TB sapos bodi bilong ol i no strong tumas.

Moa long 400 kalabus man na meri i kisim dispela toktok insait long Bomana Koreksenel institut ausait long Pot Mosbi, las mun taim ol Wol Visen i wokim kempen bilong TB na HIV.

Wol Visen TB kodineta, Berry Karo i go pas long dispela kempen wantaim Yut Adolesens Helt Asosiesen (YAHA).

CO bilong Koreksenel institut, Superintenden Kiddy Keko i tokaut olsem awenes bilong TB i kamap long rait taim na em i bikpela samting long ol kalabus lain long kisim dispela toksave. Dispela wanem kain sain bai mekim ol man long luksave long taim man o meri i kisim sik TB. Ol i toktok tu long wanem kain we bilong storim sik TB na sampela toktok na tingting we i no stret olsem buai i save

Em i givim tok promis bilong em long ol kalabus lain husat i kisim sik TB bai i kisim gutpela helpim long marasin stat long 2014, long klinik insait long haus kalabus yet. Ol bai i no ken i go moa long Pot Mosbi Jeneral Haus Sik olsem bipo.

"Mi bai wok moa wantaim ol Wol Visen na NCD Helt Sevis long kamapim moa awenes i go long ol kalabus lain, na tu long ol i ken helpim mipela long kamapim gut ol TB sevis long klinik bilong mipela," Sup. Keko said.

Dispela awenes i toktok long wanem samting i save kamapim TB, na wanem kain sain bai mekim ol man long luksave long taim man o meri i kisim sik TB. Ol i toktok tu long wanem kain we bilong storim sik TB na sampela toktok na tingting we i no stret olsem buai i save

kamapim sik TB o long kaikain long wankain plet, spun na kap.

Em i gat bikpela tenkyu long wok bilong Wol Visen long kirapim toktok bilong TB i go yet long planti ol provins long kantri.

"Ol Papua Niugini lain i gat bikpela nid yet long kisim skul bilong sik TB bikos long tingting krangi long dispel sik i save stap na i save mekim ol lain long i no save go hariap long kisim marasin na helpim i nap sik i save go bikpela olgeta," em i tok.

Dispela awenes i bin kamap bipo long 2013 Wol AIDS De i kamap, na ol i bin wok wantaim ol patna na Yut Adolesens Helt Asosiesen, husat i save wok long tokaut tu long HIV na AIDS. Ol ripot i soim olsem ol lain i gat sik HIV na AIDS i save isi tru long kisim sik TB.



Ol woda polis bilong Bomana wantaim sampela kalabus lain in kisim tok bilong sik TB. Foto: World Vision Communication

Mekim olgeta de i kamap olsem Wol AIDS

"OLGETA de i mas kamap olsem Wol AIDS De," em toktok bilong Alan Pluck, wanpela saiens tisa bilong Manly, long Sydney.

Pluck i save gat bikpela laik long skulim ol lain long HIV na AIDS long PNG. Em i tok i gat planti moa wok yumi mas mekim long daunim

tru dispela bikpela sik.

Em i bin raun long planti hap bilong Niugini Ailan olsem long Masu na Tanga Ailan.

Mista Pluck i bin wokim planti posta na DVD long planti tokples long skulim kain kain lain long sik HIV na AIDS.

Em i bin go lukim Open Memba bilong Namatanai, Byron Chan na askim em sapos em i laik helpim long givim aut ol samting bilong skulim ol lain.

Mista Chan i wanbel tru long sapatim wok Mista Pluck i mekim na em i singautim em long bungim

Namatanai Distrik Edministreta na ol arapela bikman bilong distrik.

"Byron Chan na lain woklain i amamas tru long bung wantaim mi long mekim dispela wok," Mista Pluck i tok.

Em i tok olsem, "Ol bikpela saentis bilong wol i painim hat tru long stretim hevi bilong HIV wantaim

wanpela banis marasin long dispela taim, tasol dispela sik inap pinis, taim gutpela toksave na tok skul i go aut."

"Mi traun long mekim dispela wok wantaim DVD bilong mi, "PNG versus HIV". Tasol ol wok bilong mi i no go bikpela bikos i no gat sapat long PNG gavman," em i tok.

PAINIM OL STRINGA O FRILENS RAITA LONG OL PROVINS

Wantok Niuspepa i painim ol stringa/frilens raita o lain i ken raitim ol nius stori long Tok Pisin na salim i kam long mipela long putim long pepa bilong yumi ol PNG stret.

Mipela i laikim ol stringa long Hailans rijon olsem Sauten Hailans na ol provins olsem Simbu, Enga, Jiwaka, Hela na Westen Hailans Provins. Long Momase rijon na ol provins olsem Is na Wes Sepik, Lae na Madang na long ol Niugini Ailans provins olsem Is Nu Briten, Wes Nu Briten, Manus, Nu Ailan na Otonomes Rijen bilong Bogenvil. Mipela i gat inap stringa long Mosbi na olsem Sapos yu wanpela skul tisa, wok manmeri long gavman, praivet sekta na sios, o yu wanpela manmeri i gat save na laik long rait na yu laik promotim provins na ples bilong yu, salim pas long intres bilong yu, o salim email o ring i kam na toktok long Ekting Edita. Ol kontek edres na telepon namba em: The Acting Editor, Wantok Niuspepa, C/- Word Publishing Company, P O Box 1982, Boroko, NCD. O email: editorial @ wantok.com.pg o ring long telepon namba 3252500 o feks 3252579.

FARM TRACTORS



120hp

90hp

70hp

50hp

40hp



- Slashers
- Disc Ploughs
- Disc Harrows
- Post Hole Augers
- Trailers



PORT MORESBY: 323 2668 | Dgcel: 7215 8333 / 7217 9815
LAE: 472 6324 KOKOPO: 982 6748 | email: machinery@agmark.com.pg

Wina bilong 2013 Seif Siti Singsing Resis

Yut, Meri na Famili

**Pastor
Barbara Lunge**

Jisas em i namba wan krismas presen

“WANPELA pikinini man i kamap pinis long yumi, em wanpela pikinini God i givim yumi. Em bai i stap king bilong yumi na em bai i gat ol dispela nem, “Man bilong givim gutpela tingting tru” na “God i gat bikipela strong” na Papa bilong i stap oltaim oltaim na “King bilong kamapim gutpela sindaun na bel isi.” Dispela king bai i stap senis bilong King Devit, na em bai i sindaun long sia king bilong Devit na bosim ol manmeri. Strong bilong gavman bilong en bai i wok long kamap bikipela oltaim, na bai i no gat pait na ol manmeri bai i sindaun gut oltaim. Long wanem, dispela king em i king bilong mekim gutpela na stretpela pasin tasol, na dispela pasin bilong en bai i mekim em i stap strongpela king, nau na olgeta taim bihain. Bikipela I Gat Olgeta Strong i gat strongpela laik tru long mekim gut long ol manmeri bilong en, olsem na em bai i mekim ol dispela samting i kamap. (Asaia 9:6-7)

Dispela baibel ves bilong krismas i tokaut olsem God i givim wanpela namba wan presen tru long wol. Laip i stap oltaim em i stap insait long pikinini man bilong em, Jisas Kraus. Yumi Kristen, i selebretim de mama i karim Jisas long krismas, na yumi litimapi nem bilong God long kisim bek yumi na givim yumi laip i stap oltaim oltaim olsem presen bilong yumi.

Ol nesen long wol i wok long bungim bikipela hevi nau na ol i laik mekim gutpela pasin long olgeta eria bilong sosaiti. Papua Niugini tu i stap insait long dispela. Tasol i gat wanpela rot tasol long stopim na tu long stretim ol hevi, em long yumi i mas tanim bel na i go bek long God, man i kamapim yumi. God papa bilong yumi i mekim wanpela rot wantaim wanpela pikinini man bilong em, Jisas Kraus long kisim yumi bek.

“Yupela bai harim nois bilong ol bikipelapait, na yupela bai harim tok win long ol bikipela pait i kamap. Orait yupela lukaut. Yupela i no ken kirap nogut. Ol dispela samting i mas kamap, tasol las de i no yet. Ol man bilong sampela lain bai i kirapim pait long ol naapela narapela lain. Na ol lain bilong sampela king bai i kirapim pait long ol lain bilong ol narapela narapela king. Long sampela hap ol bai i gat taim bilong bikipela hangere, na graun bai i Guria. Dispela ol samting em i olsem pen i save kamap pastai long meri i laik karim pikinini.” (Matyu 24:6-8)

Taim bilong wanpela meri i laik karim pikinini em i save pilim bikipela pen. Wankain tasol ol dispela pen bai kamap long redim wanpela man long tanim i go bek long God na kamap nupela gen long spirit. I no long mama bai karim yu gen, tasol kamap nupela gen insait long spirit.

Yu mas kamap nupela gen na bai God i kisim bek yu.

“Yumi olgeta yumi bin mekim sin, na yumi no inap stap wantaim God long heven.” (Rom. 3:23).

“Sin i save givim pe long ol wokboi bilong em. Dispela pe em i dai tasol.” (Rom. 6:23a).

“Tasol nau God i mekim wanpela wok bilong kisim bek yumi, na dispela wok bilong en em i bikipela samting tru. Olsem na sapos yumi givim baksait long dispela wok biong God, olsem wanem na bai yumi ranawe na abrusim pe bilong sin? Bai yumi no inap tru. Pastaim Bikipela yet i in autim tok long em i laik kisim bek yumi. Na ol man i harim tok bilong em, ol i bin tokim yumi olsem, ‘Dispela tok em i tru tasol.’ (Hibru 2:3).

Sapos yu laik toktok moa o yu nidim prea, yu ken rait long: Evangelis Barbara Lunge, ROGIM, P.O. Box 3063. Boroko. NCD. PNG, o ring long bm 67331426 OR 71075829 dg

SAMMY Samson, krismas bilong em 23 bilong Milen Be i winim Yunaitet Nesens (UN) Wimen, NCDC Pot Mosbi: Seif Siti bilong Wimen na Gel Program 2013 singsing resis wantaim song bilong em “Stand Up and Let's Stop Violence”.

Tripela jas bilong resis, Moses Tau, Kila Dick bilong Nesenel Kepitel Distrik Komisen (NCDC), na Bessie Maruia bilong UN Meri i tokaut olsem Mista Samson olsem wina insait long wanpela awod seremoni long YU Opis bilong ol meri bihain long ol i harim 5-pela las lain i kamapim singsing long NBC redio.

Dokta Jeffrey Buchanan, I makim opis bilong UN Wimen long PNG, i tok, “Em i gutpela long lukim planti yangpela man tude i raitim ol singsing long stopim vailens. Em ol meri na yangpela meri tasol, na ol man na ol boi, wok wantaim long daunim hevi bilong bagarap ol meri i save kisim,” em i tok.

Mis Bessie Maruia, i UN Women Elimination of Vailens Agens Wimen Kodineta, i tok, i makim maus bilong ol jas i tok, “Mak bilong resis i bin antap tu na mipela i tok tenkyu long olgeta lain i resis, long serim nupela musik na save bilong ol wantaim mipela.”

“Mipela i wok long painim wanpela singsing bai i stori long Seif Siti na kamapim ol

ples bilong ol meri long pablik, na Sammy Samson em i inapim stret dispela tingting bilong mipela. Em i kamap wantaim singsing i givim klia stori stret long we bilong em yet,” Mis Maruia i tok.

Kila Dick, Sosol Sevis Menesa bilong NCDC i tok, “Aninit long Seif Siti Program, NCDC, UN Meri na planti narapela i wok bung wantaim long mekim ol pablik ples i seif bilong ol mama na ol yangpela meri i raun.”

Biknem singa bilong Papua Niugini, Moses Tau, i tok, mak bilong dispela singsing resis em i antap stret.

“Olgeta lain bilong resis i stap hia tude em ol i wina. Ol singsing bilong ol i tasim mipela long we bilong ol yet. Olgeta i strongim toktok bilong pinisim pasin bilong paitim na bagarapim ol yangpela meri na ol mama tu,” Moses i tok.

Calexus Simeon i kisim namba tu ples long singsing bilong em, “Lukautim Maket”, “The Watchdogs” i kisim namba tri ples wantaim singsing bilong ol, “Safer City for Women and Girls”. Geraldine Sanduhu, wanpela gel i gat 17 krismas, i bin kamap namba 4 long ol lain i resis na em i singim song, “Save our Women, Save our Girls”. Namba 5 ples em wanpela grup, ol 7-pela bilong Buk bilong Pikinini, na ol i kamap



Wina bilong Seif Siti bilong ol Meri song resis, Sibona Lo, han kais na Sammy Samson, long song bilong ol, “Stand Up and Let's Stop Violence”. Foto: UN Women

wantaim song, “No Violence against Women and Girls”.

Dispela singsing resis i bilong givim tingting long ol yangpela lain bilong pilai na singim singsing long kamapim

ol singsing bilong strongim wok bilong daunim pasin nogut bilong bagarapim na paitim ol mama na ol yangpela meri long ol pablik ples long siti. UN Meri Seif Siti Program

Digicel Faundesen bringim Spirit bilong Krismas

MOA long 2000 pikinini i bin amamas long krismas wantaim Digicel Faundesen long Fraide 13 Desemba, 2013 insait long Pot Mosbi.

Klostu long 2500 pikinini long Pot Mosbi, Galp na Sentral Provins, Lae, Maun Hagen na Goroka wantaim ol sik pikinini long ol haus sik long ol Niugini Ailan na Buka, i kisim ol krismas presen long dispela “Serim Krismas Spirit” program bilong Digicel Faundesen. Senia Program Menesa, Ruth Javin na Program Menesa bilong Komyuniti Developmen, Rhoda Moses i bin go pas long dispela program.

Komyuniti Lening Senta (CLC) Krismas Program i bin stat long 25 Novemba 2013 na i pinis long 16 Desemba long Pot Mosbi. Dispela program i save kamap olgeta yia.

Long 2013 i gat nupela senis olsem ol i kamapim bes peformin gel na boi awod bilong wan wan CLC. Dispela awod o presen em i bilong kirapim ol sumatin long go long skul olgeta taim, na mekim gutpela pasin insait long wanpela skul yia.

Sif Eksekutiv Opisa bilong Faundesen, Beatrice Mahuru i

tok, “Taim yu lukim kain we ol CLC i stat long en, na wanem kain developmen i kamap long strongim ol wok bilong ol, yu ken givim bikipela luksave na apim nem bilong ol long bel kirap ol i gat long strongim wok i go yet, maski ol i bungim hat taim.”

O'Connor CLC long Pot Mosbi i bin mekim gut tru long yia 2013. Dispela em i soim strongpela tingting ol tisa wantaim menesmen wantaim stia bilong het tisa, Renagi Tomuriesa, long mekim gutpela wok. Dispela CLC i save skulim ol liklik pikinini, krismas bilong ol 10 na i go long bikipela lain krismas bilong ol inap long 21.

Het tisa, Tomuriesa em i amamas long gutpela sapat ol i kisim long Digicel PNG Faundesen, maski skul i stap long hap we i no gat planti man i save laiki long go long en.

Ol pikinini i kisim sampela presen tu i kam long Operesen Krismas Pikinini (OCC), wanpela projek bilong Samaritan's Purse Australia. Dispela i wanpela Intenesenel Kristen.

Ogenaisesen i save soim laikim blong God long ol tarangu pikinini long planti hap bilong wol.

Yangpela Westpac Awod Wina i greduet

WINA meri bilong Westpac Outstanding Women Award (WOW), Yang Achiever Awod, Naime Tom i laik mekim senis long wok bilong em.

Dispela i bihain long em i pinisim skul long PNG instituit of Benking na Bisnis Menesmen (IBBM) wantaim Diploma in Menesmen.

Mis Tom i winim WOW Yang Achiever Awod long 2012 aninit long sponsa bilong (IBBM). Dispela awod i luksave long ol yangpela meri bilong Papua Niugini long gutpela wok bilong ol long taim ol i statim wok bilong ol.

Meri i kisim dispela awod i save kisim wanpela tropi na wanpela yia long skolasip long stadi long PNG iBBM wantaim mak bilong K26,000, long helpim ol long kamapim gut wok mani bilong ol.

Mis Tom em i wok wantaim Kiunga Stevedoring Limited, o Steamship Trading Company Ltd, na em i wanpela namba wan meri long draivim poklip.

Em i bin soim strongpela pasin bilong wok long wok ples we ol man tasol i save wok.

Em i gat bikipela tingting long kamap menesa bilong wanpela Steamship pot na stevedoring operesen insait long kantri.

Geoff Toone, Rijinel Jeneral Menesa bilong Westpac



Mis Naime Tom i greduet long IBBM wok. Em i gat bikipela tingting long kamap menesa bilong wanpela Steamship pot na stevedoring operesen insait long kantri.

PNG, i tok greduesen bilong Mis Tom long IBBM bai helpim em gut long wok bilong em.

“I gat bikipela bilip olsem Naime bai kamap wanpela lida insait long bisnis na mi laik tok amamas long em i mekim gut tru long skul bilong em. Wantaim dispela ekspiriens, Naime bai wok strong long kamap long wanem kain wok ples em i gat laik long em.” Mista Toone i tok.

Em i tok moa olsem Westpac i gat bikipela luksave long ol yangpela olsem Mis Tom long ol anuel Westpac Outstanding Wimen Awod.

I hat long ol Kristen long Gaza long selebret long Betlehem

I kam long Zenit Nius

OL Kristen pipel long i save stap long Gaza klostu tasol long Betlehem, ples we Mama Maria i karim Jisas moa long 2,000 kris-mas i go pinis, i wari bikos ol i no bin nap long go long ol lotu long hap long selebretim Krismas De.

Ol ripot i kam long Zenit Nius, Vatiken long Rom i tok gavman bilong Israel i no tok oraitim planti ol visa aplike-sen bilong planti tausen Kristen manmeri na ol Grik Otodoks na Katolik Sios i putim i go long gavman bilong Israel.

Tupela yangpela marit bilong Grik Otodoks Sios, Susy i gat 22 krismas na

Samer i gat 30 krismas, i tok long sampela yia nau, ol i putim askim long go selebretim krismas lotu long Betlehem na tu, lukim ol wanpisin bilong ol, tasol ol atoriti bilong Israel i no save givim tok orait.

"Mipela i laik go lotu long Sios bilong Netiviti, tasol nogat. Long Gaza nau, i no gat spirit bilong Krismas bikos long iekonomik situesen na tu, i no gat sans tumas long selebret.

"Em i driman bilong olgeta Kristen manmeri long stap long Betlehem long taim bilong Krismas. Mipela i stap klostu stret long Betlehem siti, tasol mipela i no inap go

long hap," Samar i tok.

Bisop Alexio bilong Grik Otodoks Sios i tok, "Mi stap long Gaza long 12-pela kris-mas na lukim olgeta pait na mi lukim tambu ol i putim long blokim siti na pipel. Mia skim ol wol pawa long mekim samting long rausim dispela na ol manmeri long (Gaza) Strip i ken kam na go bikos laik pasin i stap long olgeta hap, tasol yumi mas lukim long lewa bilong yumi," Bisop Alexio i tok.

Em i tok sios i save givim ol aplikesen olgeta yia, tasol i no em i givim tok orait.

Em i bilip olsem hevigi i stap long pait namel long Is-rael na Palestain na olsem

tasol, ol i putim banis o tambu we i kamapim hevigi long ol yangpela pipel.

Boman bilong Rilijes Rile-sens long Grik Otodoks Sios long Gaza em Jabr al-Jal-deh, i tok planti tausen Kristen manmeri long ol narapela lotu i putim askim bilong ol long go long Betle-hem, na sampela i kisim ol visa. Tasol planti yangpela we krismas bilong ol i stap namel long 16 na 35 i no kisim tok orait.

Long dispela yia, gavman we Hamas i go pas long en i larim ol Kristen i putim ol dekoresen long sampela stoa na tu, putim Krismas tree o diwai long siti.

Ol Lutheran Kristen tingim spesel Krismas lotu

Paulus Tali i raitim

KRISMAS em i wanpela spesel de we ol Kristen bilip manmeri tingim de,

bilong bikepla Jisas we mama Maria i karim em long haus bilong haus bilong ol bulmakau.

Ol Lutheran Hailans komyuniti long Kamkumu, Lae i bin holim wanpela spesel Krismas lotu wantaim baptisim bilong 8-pela pikinini. Dispela em nupela wokabout bilong ol Kristen insait long liklik eria we maski ples bilong kain kain nois, kros pait, tasol Kristen bilip manmeri i stap na lotu

long tingim Bikpela.

Long dispela liklik kongrigesen i gat moa long 250 Kristen na planti bilong ol em ol Simbu. Dispela Kongrigesen bin stat long 2007 we i bin gat 7-pela bilipman tasol insait long bus haus na inap nau bikpela senis i kamap na planti Kristen nau i save kam lotu

Ol i statim program bilong lotu kam inap Lae Siti Lutheran Seket na Yabim Distrik i no luksave long sapotim ol aninit long wokabout bilong sios. Lotu bilong ol stap strong na tupela sios lida, Alois Towadong na Dickson Kiau tok, "Mipela ting bai Lae Siti

seket, na Yabim luksave tasol nogat. Mipela em bilip man meri bilong Lutheran tu na mipela i stap em Boda bilong Lae Distrik na Aihi LLG long Kamkumung.

"Mipla i bin holim spesel lotu long Krismas na Pasto Wesley Kerenga, Skruim Save Dairekta long ELC-PNG Het Opis i bin kam na autim tok bilong God na baptaisim 8-pela pikinini. Dispela taim Pasto Kerenga i autim tok long John 1:14 long Tok bilong God i kamap man."

Long wankain taim em tokim ol papamama long ol mas laikim pikinini em ol

blesing bilong God olsem God em laikim pikinini bilong em Jisas em dai long sin bilong yumi. Ol Kristen bilip manmeri long Hasu Kamkumung i amamas tru long long gutpela tok bilong God we blesim ol wantaim ol pikinini na ol kisim holi komunien.

Maski bikpela ren, ol Kristen bilip manmeri i no surik, ol i amamas tasol long lotu na ol i kamap na lotu tu i kamap gut tru wantaim bikpela amamas. Long pinis bilong lotu ol kongrigesen lida i givim presen long ol wokmanmeri ol save givim taim long wok sios long kongrigesen.



Pop Benedict.



Pop Francis.

Tupela Pop i serim lans long Krismas

KRISMAS em i taim bilong selebret, sea na bung wantaim ol famili na pren.

Long dispela krismas long Vatiken siti, tupela Pop i bin bung wantaim na serim lans kaikai.

Pop Emeritus Benedict 16, em pastaim hetman bilong Katolik Sios long wol, tasol em i bin risain long stat bilong dispela yia, i bin go long Casa Santa Maria na serim lans wantaim nau hetman, Pop Francis.

Pop Francis i bin askim pastaim hetman long go lukim em long Krismas de bi-hain long em i bin go long Mater Ecclesiae Monastri long Vatiken siti we Pop Emeritus Benedict 16 i stap long en.

Vatiken Redio i bin stap long dispela bung kaikai wantaim tu ol seketeri bilong ol

wan wan dipatmen long Vatiken na tu, Sekreteri bilong Rilesens wantaim Stetem Asbisop Dominique Mamberti na Monsigno Bryan Wells em Asesa bilong Jenerel Afeas bilong Seketeri bilong Vatiken Stet.

Ripot i tok tupela Pop i gat bikpela rispek o luksave na tu, laikim wanpela narapela, na Poip Francis i lukim Pop Emeritus Benedict 16 olsem bubu i gat bikpela save na i gutpela long stap klostu wantaim.

"Sapos mi bungim sampela kain wari, mi ken go tasol na toktok log em, olsem tasol mi bin mekim taim hevigi long Vatilik i bin kamap," Pop Francis i bin tok pastaim long wanpela nius bung long pinis bilong Wol Yut De sampela mun i go pinis.

ELC Karkar Distrik redi long namba 29 Sinod

Paulus Tali i raitim

EVANGELIKOL Lutheran Sios insait long Karkar Distrik long Madang bai lukautim bikpela bung bilong ol Lutheran insait long kantri. Dispela bikpela 29 Sinod bilong ELC bai kamap long Januari 12 i go inap long 17 long Karkar Sekenderi skol.

Ol i ting olsem namel long 8,000 na 10,000 Kristen bilong ELCPNG bai kamap long Karkar Ailan.

Kristen manmeri long Karkar Distrik em klostu moa long fifti tausen na planti em ol Lutheran. Ol wok redi i kamap gut we ol Kristen long 6-pela seket i amamas tru long hostim Sinod Namba 29 na ol i ting em i bikpela samting long ailan.

Memba bilong Sumkar, Ken FairWeather i baim wanpela len krusa kar long K140,000.00 long Ela Motors na givim i go long sapotim wok bilong Sinod.

Ol deliget bai kam long ol arapela 16 distrik bilong Evanjelikal Lutheran Sios bilong Papua Niugini. Bai ol i toktok moa long wok bilong Gutnius na ol arapela bikpela samting bilong ELCPNG.

Garim Matae, Sios Kaunsel memba bilong Karkar Distrik i tok tenkyu long Memba bilong Sumkar, Ken Fairweather long soim tru bel bilong em long sapotim wok sios. Em i tok ol pipel laikim

kain memba olsem inap long bringim sevis long gavman na sios.

Ol Kristen bilong Takia na Waskia na ailan Bagbag bai givim bikpela sapot long lukautim ol deleget long kaikai. Ol manmeri i givim long strong bilong ol yet wantaim ol liklik bisnisan long ailan tu wantaim wan wan seket husat i putim mani mak long wan tausen.

Siaman bilong Sinod Hosting Komiti, Bernard Kaisom i tok, het tok bilong sinod namba 29 em Matyu 11: 6 Givim Kaikai Bilong Dispela De. Ekting preseden, Pasto Masul Bagel i tok, ol Kristen bilong Karkar nau laik lukim ol Kristen deliget i mas tok-tok moa long wok bilong Gutnius na i no bilong tokpait long kago, mani na bisnis.

Ol Kristen bilong Karkar bai amamas long lukim arapela deliget wantaim singsing long kalsa bilong ol, na tu ol yangpela bai go pas long kain kain program long singsing musik, tieta na drama. Memba bilong Sumkar i gat bilip, PM Peter O'Neill, na gavana bilong Morobe, Kelly Naru bai kamap long dispela sinod.

Long Jun 2013, pes man bilong Sumkar MP bin kamap long taim bilong brukim graun na givim tri handet tausen kina long sapotim wok bilong sinod. Praim Minista i bin givim faiv handet tausen kina long sapotim dispela sinod.





Ol Federal Polis bilong Australia long Pot Mosbi na Lae i wok wantaim ol wanwok bilong ol long PNG. Foto: ABC

PNG i gat gutpela Krismas

POLIS long Papua New Guinea i tok ol i amamas no gat planti trabel na hevi i bin kamap long taim bilong Krismas

Deputi Polis Komisina bilong Operesen long Papua New Guinea, Simon Kauba i tok, em i no bin kisim ripot long bikpela hevi taim ol pipel i makim Krismas raun long kantri.

Mista Kauba i toktok tu long wok bilong Federal Polis bilong Australia long Pot Mosbi na Lae, na i toksave gen i go long pablik long lukautim ol yet, taim ol i wok-about long wanpela hap i go long narapela long rot na solwara.

Deputi Polis Komisina Kauba i tok i luk olsem no gat bikpela trabel i kamap long kantri, tasol no gut sampela liklik i kamap, tasol em i no kisim toktok long dispela yet.

Em i tokaut olsem ol lain polis bilong Australia husat i wok nau long kantri i helpim gut wok bilong polis long Lae na tu long Pot Mosbi.

Long wankain tu, Solomon Ailan pipel i makim gut krismas tu we pipel i stap isi na selebret. Gina Kekea, niusmeri long Solomon Ailan i tok long Honiara, kapitel bilong Solomon Ailan, ol pipel bilong ol povins i bin makim Krimas De wantaim ol sios sevis na bung wantaim ol aemali na pren.

Mis Kekea i ripot olsem ol pipel long kapi-tel i bin go daun long ol nambis bihain long sios sevis long Krismas De na bung wantaim, na amamas serim kaikai na pilai na swim long solwara.

Polis operesen i bin stat pastaim long Krimas na bai go het yet long nupela yia, 2014.

Prais bilong pawa i kamapim bel hevi long Northern Teritori

PLANTI pipel i wari tru long mak bilong pawa i go antap nau long Northern Territory

Melanie Arnost ABC niusmeri long Northern Territory i tok i gat bikpela wari i kamap nau long Northern Territory bilong Australia we mak bilong pawa bil i go antap tumas long 20 pesent na dispela i mekim planti pipel i no bilasim haus bilong ol wan-

taim ol krismas lait olsem ol i save mekim long ol yia i go pinis.

Mis Arnost i tok long dispela taim we planti pipel long Australia i wok long makim taim bilong krismas na Nu Yia.

Em i tok tu olsem, long Krismas nait polis i bin holim pasim wanpela man krismas bilong em 51 long fran bilong bikpela haus lotu long Darwin.

Polis i putim tupela sas long dispela man.

Australia Foren Minista sapatim tingting

FOREN Minista bilong Australia i sapatim tingting bilong stopim mani i go long PNG

Julie Bishop i tok em i sapatim tru dispela tingting long stopim mani bilong baim ol medikal kits i go long Papua New Guinea.

Australia i tok em i stopim dispela progrem we em i save givim marasin i go long ol helt senta long Papua New Guinea bihainim ol bikpela wari long korapsen.

Dispela mani em Australia i stopim i karamapim samting olsem \$38million dola long dispela progrem we em i save salim ol marasin i go long ol rurel helt senta long kantri long wanem, Australia i wari long kain rot em PNG i bin bihainim long givim kontrak i go long sampela kampani bilong Saina.

Pastaim long dispela, aninit long wok bilong Ausaid, em yet i bin save makim ol marasin kampani, tasol long dispela yia, gavman bilong PNG yet i bin makim dispela marasin kampani.

Nau gavman bilong Australia i tok, em i bin tokim PNG long ol wari bilong en long dispela kontrak, tasol gavman i no bin harim tok. Olsem na dispela \$38 million dola bai no nap go nau long PNG.

Long mun Jun, gavman bilong PNG i bin rausim sampela hap toktok long lo we i karamapim dispela wok Na dispela i bin larim gavman long makim wanem kain kampani em i laik givim kontrak long en.

Mis Bishop i tokim ABC Australia i bilip olsem dispela kampani bilong Saina i no wanpela gutpela kampani long kisim ol marasin long em.

Mis Bishop i tok tu olsem gavman bilong en i redi long toktok gen wantem PNG gavman long dispela hevi, tasol PNG i mas tingting gut na stretim dispela asua em i bin mekim long givim kontrak i go long kampani bilong Saina.

Ol poto nius



Misis Parkop lidim tim i go long givim presen na ol kaikai long Pom Jeneral Haus sik. Foto: Nicky Bernard



GUTPELA KRISMAS PRESEN: Nem bilong mi em Paul Walker na mi painim wanpela famili long kisim mi, dispela naispela hapkas dok i save stap long RSPCA long Waigani, Mosbi, Nesenel Kapitel Distrik, i tok. Sapos yu laikim wanpela naispela klinpela na helti dok long lukautim, go long RSPCA opis na lukim ol woklain. Foto: RSPCA Pablisiti Desk



AIM BILONG KISIM PRESEN: Krismas em i taim bilong amamas, sea, givim na kisim presen. Ol pikinini i amamas long kisim presen long Fada Krismas long wanpela Krismas pati we bikpela komyunikesen kampani, Digicel i bin putim kamap.


PNG bai lukim kaikai bilong ol hatwok long 2014



Yumi statim nupela yia 2014 wantaim planti bikipela senis, ol gutpela na ol dispela i no gutpela tumas. Ol pipel bilong Mosbi husat i save kaikai buai bai pilim pen bilong lo bilong NCD i stapim olgeta maket bilong salim buai. Gavana Powes Parkop i putim bikipela tok save gen olsem planti lain i harim tok na stapim buai tasol sampela i bikhet yet olsem na long Januari 1, 2014, bai i tambu tru long salim buai insait long siti.

Na long Lae, yumi harim Gavana Kelly Naru i putim bikipela tok save olsem em i rausim olgeta wokmanmeri long opis bilong em. Mista Naru i tok em i laik kisim ol wokman husat bai mekim stret wok bilong lukautim ol pipel bilong Morobe Provins. Gavana i no wanbel tumas long pasin planti pablik sevan long provins i mekim we i no bihainim lo bilong Jeneral Odas bilong ol pablik sevan.

Long Is Sepik, i gat hevi bilong lo na oda long Wewak taun yet na ol arapela distrik tu. Bikipela askim i stap nau long ol polis bilong provins. Hevi i kamap bikos ol polis i no gat kontrol long taim ol i mekim wok bilong lukautim lo na oda. Ol i kamapim moa hevi long taim ol yet i brukim lo na paitim man o mekim nabaut long ol pablik. Dispela pasin bilong disiplin em i bikipela samting. I mas gat strongpela skul long ol lain bilong ami na polis long pasin bilong disiplin. Sapos i no gat disiplin na kontrol long



wok bilong ol, mobeta ol i lusim dispela wok bilong lukautim lo na oda na givim spes long ol arapela husat inap long holim gut wok.

Las yia, Praim Minista Peter O'Neill i bin tok 2013 em i yia bilong implementesen, o mekim wok i kamap. Yumi lukim planti wok i kamap pinis tasol planti moa i

no kamap. Wampela as bilong ol wok i no kamap i pas long ol wokman bilong mekim wok. Sapos i gat gutpela wokman husat i klia long wok bilong em na i gat gutpela sapot long dipatmen bai wok i ran gut. Yumi olgeta i luksave long dispela. I tru i gat sampela arapela samting olsem wok politik o jeles

pasin i save kamapim hevi na bagarapim gutpela wok.

Hevi bilong wan wan provins i pas long gavana bilong provins. Gavana i mas raun na lukim ol pipel na wokmanmeri bilong gavman insait long provins bilong em. Em i mas save long wanem samting i kamap long ol distrik na i go daun olgeta long

komyuniti level. Dispela pasin bilong sindaun long opis long taun na mekim wok long rimot kontrol i mas pinis. Nau i taim bilong sanap na mekim wok i kamap long wan wan provins. Sapos yumi skelim ol gavana bai yumi lukim olsem i gat ol eksen gavana na sampela husat i no smat tumas long sanap baksait long ol pablik sevan na kamapim wok long provins bilong ol. Ol provins i mas opim ai na makim strongpela gavana husat inap long kamapim wok insait long provins.

Dispela nupela yia bai wampela gutpela yia bilong wokmani bilong kantri. Long namba tu hap bilong 2014, bai kantri i lukim mani bilong LNG long taim ExxonMobil i stat long salim ges i go long ol ovasis kantri. Yumi tok amamas long kampani i gat bilip long PNG na i strong long kamapim bikipela wok tru long developim dispela bikipela ges projek.

Ol arapela bikipela ovasis kantri i luksave olsem PNG i wampela gutpela kantri long wok bisnis. Tasol i gat tu sampela askim i stap long bisnis bilong maining na petroleum. Olsem wanem nau long Ok Tedi? Gavman bilong PNG i papa bilong dispela kampani nau tasol i gat planti samting i no klia yet. Ol papagraun i gat ol askim i stap na provinsal gavman tu i wet long lukim wanem kain gutpela samting ol bai kisim long helpim provins.

Ating long 2014, bai gavman na ol saveman bilong en i tok klia long yumi long

wanem plen bilong ol long bihaintaim bilong Ok Tedi.

Ol pikinini bilong yumi bai kisim fri edukesen yet. Ol pipel i amamas long harim dispela gutpela nius. Tasol i no gat inap klasrum na tisa long skulim planti moa pikinini bilong yumi. Kualiti bilong ol tisa na ol buk na samting bilong helpim ol pikinini i no gutpela tumas. Long kirap bilong 2013 i bin gat strongpela toktok bilong rausim OBE sistem bilong skulim ol pikinini.

I bin gat wokpainimaut i kamap na ripot i kamap, tasol i luk olsem dispela tu i dai nating. I no gat wampela wok i kamap long raitim nupela karikulam o ol buk bilong ol studen na tisa. Long taim skul yia i stat long Februari 2014, ol tisa na pikinini bai i no inap long paul nabaut.

I gat planti moa salens i stap long 2014 long wok bilong gavman na long yumi wan wan manmeri tu. Wanem samting yumi mekim long bungim ol dispela salens bai soim sapos yumi bilip long kamapim gutpela sindaun bilong ol pipel bilong yumi nau na long bihaintaim. Gavman i skelim bikipela mani tru, K15 bilien bilong 2014 baset.

Dispela kain mak bilong mani tu i givim bikipela wok long ol pablik sevan na ol politisen long nesenel na lokal level tu. Ol i mas mekim stret wok na bai ol pipel i ken lukim kaikai bilong mani gavman i skelim i go long olgeta wok bilong en long kantri. Sapos implementesen i bin kamap tru long 2013, ating PNG bai lukim kaikai bilong dispela hatwok long 2014. Hepi Nu Yia!

Stilman rausim ol Wol Woa 2 mak bilong Madang

JAMES G. KILA i raitim

OL STILMAN long Madang taun i mekim rabis pasin tru long rausim ol metal bras na kopa sain we i gat mak o histori bilong Madang provins bilong Wol Woa 2 we i stap arere long Kalibobo laithaus.

Ol stilman i rausim ol dispela sain o histori mak long kopa na salim i go long ol skrep metal baia long Madang taun.

Olpela rijonal memba bilong Madang, Sir Peter Barter i tokaut long dispela. Em i no amamas long pasin ol lain stilman i mekim long rausim ol samting we i soim histori bilong Madang long Wol Woa 2.

Sir Peter i givim toksave bilong em long NBC Redio Madang na em i tok pasin ol lain stilman i mekim i no soim rispek long histori bilong Madang.

Madang i gat planti histori bilong Wol Woa 2 i kamapim hevi long eria. Na i gat ol ples we ol paitman bilong Australia,



Bus na gras i gro arere long Madang Kalibobo laithaus. Foto: James G. Kila

Japan na tu pastaim long en, ol Jeman i lusim laip long ol long en.

tasol. Kalibobo Lait-toktok o lait

Tude planti turis i save go long lukim na kisim poto bilong ol ples we histori bilong woa i stap long en.

Dispela ol kopa sain plet ol i putim arere long Kalibobo i soim histori bilong Madang we ol pikinini na tumbuna long bihaintaim i ken ritim na save long en. Tasol ol stilman i rausim na go salim kopa na bras plet sain ya long kisim mani long amamas long sotpela taim

haus em wampela mak we i soim histori bilong Madang long bipo yet. Na tude tu, dispela lait i save soim rot long ol sip long go insait long Madang haba long nait. Lait-toktok ya em ol lain Jeman i wokim na em i sanap long Godawan Poin.

Ol lain manmeri bilong Madang i save amamasim Remembrens De long tingim ol lain i pait na lusim laip long woa wantaim ol spesel sevis arere long Kalibobo.

NBC Redio Madang i mekim bikipela askim i go long ol pablik manmeri long Madang long soim rispek long dispela ol sain o mak ol i raitim long kopa na putim arere long Kalibobo lait haus

Redio Madang i tokaut tu olsem sampela baia bilong skrep metal i bin painim sampela ol kopa sain wantaim histori na i no amamas na ol i bringim bek ol dispela samting i go long Madang Haus Tumbuna na Kalsa opis.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea Telephone: (675) 325 2500 Fax: (675) 325 2579

Email: editorial@wantok.com.pg Websait: www.wantokniuspepa.com Pe bilong wampela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga Acting Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out full on the display advertising form.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
7:00pm - Nius - YUMIFM Nius Senta

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - NIUS - YUMIFM Nius Senta
2pm - 6pm - Sarere Avinun Cruz

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

Raun wantaim Wantok kru ...

Sheppard Ben helpim Pilipins

Nicky Bernard i raitim

SHEPPARD em nem we yumi save harim long Papua Niugini long bikpela Kot Haus bilong yumi long Waigani na sampela hap long PNG.

Dispela ben i karim yet name bilong papa bilong ol husat em namba wan loya long Papua Niugini.

Sheppard ben bin kam stap insait long kantri long helpim mekim mani bilong ol pipel bilong Pilipins long dispela bikpela hevi bagarap ol kisim long bikpela win.

Dispela ben em tripela pikinini bilong Sheppard bin kirapim long sampela yia i go pinis, na i wok long pairap strong long Australia na ol bin autim pinis sampela CD na keset bilong ol pinis.

Ben lida bilong ol, George Sheppard save pilai kibod na singsing na tupela susa bilong em Emma Sheppard save pilai bes gita na singsing. Na Amy Sheppard save singsing na pilai maus ogen. Jason Bovino na Michael Butler save pilai dram na gita long helpim tripela susa brata.

Extensions ben i miksim musik bilong ol na helpim pilaim sampela singsing long kik ov long dispela gutpela fanresing bilong helpim ol taragu long Pilipin.

Extension ben tu i bin miksim planti bilong ol musik na setim ol stet na samting bilong pilai bilong ol narapela bikpela ben kam long ovasis.



EMTV Television Guide

FONDE JANUERI 2, 2013

4:30 AM G AUSTRALIAN NETWORK
5:00 AM G JOYCE MEYER
5:30 AM G EMTV NEWS REPLAY
6:30 AM G TODAY
9:00am
10:30am
11:55
13:30

6:00 PM G EMTV NATIONAL NEWS
7:00 PM G RAIT MUSIK EP#195
8:00 PM G The Best of RESOURCE PNG EP#98
9:00 PM G HOT SPOT EP#45
9:30 PM PG ELITE MUSIC ZONE EP#45
10:00 pm G NEWS REPLAY
.....followed by the Australia Network

5:00 pm G THE SHAK SERIES 2 EP#37/75
5:30 PM G SKIPPY THE BUSH KANGAROO -
5:55 PM G CRIME STOPPERS
6:00 PM G EMTV NATIONAL NEWS
7:00 PM G IN MORESBY TONIGHT - Ep#
7:30 PM PGR MODERN FAMILY YR.3 - EP#23
8:00 PM PGR MODERN FAMILY YR.3 - EP#24
8:30 PM MAO FRIDAY NIGHT MOVIE
10:30 PM G EMTV NEWS REPLAY
.....followed by the Australia Network

8:00 AM G YOGA CITY EP#4/13 rpt.
8:30 AM G AMAZING SPIES - EP#6 Rpt....
9:00 AM G THE ASHES - TEST 5 DAY 2
12:00 pm G CRICKET SHOW
12:30 PM G DAY 2 CONTINUES....
5:00 PM G ESCAPE FROM SCORPION IS
5:30 PM G OLSEM WANEM EP#37
6:00 PM G EMTV NATIONAL NEWS
6:30 PM PGR HOW TO LIVE WITH YOUR PAR
7:00 PM PGR NEW GIRL S1 EP#14/24
7:30 PM PGR WHITE COLLAR YR.3 EP#14/16
8:30 PM G RAIT MUSIK REPEAT... EP#195
9:30 PM G HOMELAND S2 - EP#12/12
10:30 PM G NATIONAL EMTV NEWS REPLAY

6:30 AM G IT IS WRITTEN
7:00 AM G HILLSONG
7:30 AM G AUSTRALIA NETWORK
8:00 AM G YOGA CITY EP#5/13
8:30 AM G BEST OF BUSINESS PNG# 02.
9:00 AM G MARTIN MYSTERY - Ep#26
9:30 AM G OLSEM WANEM- Ep#2014/02 Repeat
10:00 AM G BEST OF RESOURCE PNG -Ep#98 Repeat
11:00 AM G TBA
11:30 AM G COOKING ISN'T ROCKET SCIENCE - EP#8 - RE-RUN
12:00 pm G CRICKET SHOW
12:30 PM G DAY 3 CONTINUES....
5:00 PM G TBA
5:30 PM G DEEP WATER EP#7
6:00 PM G EMTV NATIONAL NEWS

FRAIDE JANUERI 3, 2013

4:00 AM G AUSTRALIA NETWORK
5:00 AM G JOYCE MEYER
5:30 AM G EMTV NEWS REPLAY
6:30 AM G TODAY
9:00 AM G DAY 5
4:30 AM G AUSTRALIA NETWORK
6:00 AM G EMTV NEWS REPLAY
7:00 AM G IN HIS STEPS EP#16
7:30 AM G TBA

SARARE JANUERI 4, 2013

SANDE JANUERI 5, 2013

3:30 AM G AUSTRALIA NETWORK
6:00 AM G EMTV NEWS REPLAY

- Antap**
 1 Kampani laik painim gol long solwara
 7 De mama i karim Jisas
 14 Sel mani bilong Nu Ailan
 15 Dipatmen i lukautim mani bilong ol main
 16 Gutpela tru
 17 Lapun long tok Inglis
 18 Pekato
 19 Kaikai ol i wokim long susu
 20 I gat ples long putim samting
 23 Draipela wara kontena
 24 Bekim
 27 Binen
 28 Namba wan Praim Min-ista
 31 Bilong lukim samting
 32 I no hatwok
 33 Ol soldia
 34 Strongpela kantri long wol
 36 Skelim
 40 I no aut

- 41 Pasim tok
 42 HIV i kamapim dispela sik
 44 Banis bilong susu
 46 Namba faiv mun
 47 Ailan provins
 49 Presiden bilong USA
 52 Sik tubekulosis
 53 Jisas i tok em i wasman bilong ol
 56 Mobail fon kampani
 58 Bilong harim
 59 Pasindia ka
 60 Apim na wokabaut wan-taim
 61 Pawa i stap olsem bai masin i wok
 63 Yu tasol
 64 Stik bilong wipim man
 66 Bilong wasim samting
 67 Kurakum
 70 Yunaitet Nesen
 72 Stori pes long mobail
 74 Laikim tru
 76 Ailan long Milen Be
 79 Askim


- 81 Draiva bilong balus
 82 Tul bilong katim plang
 83 Em
 85 Nem bilong man
 86 Salim toktok long mobail (salim SMS)
 89 Gret long skul
 91 Wankain olsem 33
 93 Bikpela skin
 95 Pairap
 97 Mak bilong kompas
 98 Wok didiman
 103 We ol samting i stat
 105 Not Atlantik Triti Oge-naisesen
 106 Mr long tokples Kuanua
 107 Ailan long Morobe
 108 Infomesen Teknologi
 109 Likwifait Neteurel Ges
 111 Kastam
 112 Nupela provins

- Daunbilo**
 1 Tok pilai nem bilong ol Nu Ailan
 2 De i go pinis

- 3 Lain i lukautim turis bisnis
 4 London Misineri Sosaiti
 5 Abus bilong solwara
 6 I givim lait long graun
 7 I no hat moa
 8 I no stap autsait
 9 Lait
 10 Ring wanpela taim na stop
 11 Begin
 12 Samting bilong kilim abus
 13 Viles
 14 Namba wan siti long PNG
 21 Bilong sindaun
 22 Mun bilong Krismas
 23 Tenkyu
 25 Nogat
 26 Moning taim
 28 Fada Krismas
 29 Yu tasol
 30 Lo
 35 Nem bilong meri
 37 Mak bilong rula
 38 Mama bilong Jisas
 39 Long taim bilong Jisas

- 41 Mani bilong baim wok
 43 Spak drink
 45 Sios long PNG
 46 Bilas bilong ol tumbuna
 48 Strongpela kantri long wol
 50 Binen
 51 Namba faiv mun
 52 Dring long moning
 54 Karamap bilong bodi
 55 Givim samting long amasim narapela
 56 Wasman bilong ol sik-man
 57 Institut ov Nesenel Afeas
 59 Hap bilong bodi
 62 Fon bilong karim raun long poket
 63 Sain
 65 Luksave mak bilong wan-wan samting
 68 Nem bilong ol Hula
 69 Madang, Morobe na Sepik
 71 Distrik long Saten Hailans

- 72 Nem bilong meri
 73 Bilong pasim klos
 75 Graun bilong nambis
 77 Wewak i stap long dispela Sepik provins
 78 Redi pinis long kamautim
 79 Westap
 80 Wankain olsem 41
 84 Wanpela diwai
 85 Enimal
 87 Kaikai
 88 Samting bilong sindaun
 90 Pisin bilong wara
 92 Kumul bilong Enga
 93 Bilong kukim samting
 94 Ples graun malmalum
 96 Hait na kisim nating samting
 99 I no kam
 100 Mani masin
 101 Siti long Kalifonia, USA
 102 Salim mani kwik
 104 Em i soim rot long tripela king i go long Betlehem
 110 Nesenel Alaiens



© ABS, 2013



Ansa bilong kroswod long las wik isu # 2051

SUDOKU

Ansa bilong las wik SUDOKU 25

2	6	3	8	9	5	7	4	1
4	1	9	7	3	2	6	8	5
8	7	5	4	6	1	9	2	3
1	9	2	3	8	4	5	6	7
3	5	4	6	2	7	1	9	8
7	8	6	1	5	9	2	3	4
6	4	7	2	1	8	3	5	9
9	3	1	5	4	6	8	7	2
5	2	8	9	7	3	4	1	6

4			7			8	5	
9	7		4		3	6		
	5	6	8					
	4	7		3	6			
6		5				2		7
			5	1		4	8	
					5	1	4	
		9	6		4		2	5
	8	4			2			9

Ansa bilong SUDOKU 26 long neks isu.

EMTV Television Guide

6:30 PM G PACIFIC WAY S8 EP#18	5:30 AM G EMTV NEWS REPLAY	5:00 AM JOYCE MEYER	7:00 PM G HAUS & HOME	3:30 PM
7:00 PM G TOK PIKSA EP#2014/01	6:00 AM G TODAY	6:30 AM G NATIONAL EMTV NEWS REPLAY	8:00 PM G BEST OF BUSINESS PNG	4:00 PM
7:30 PM G 60 MINUTES Join 60 Minutes Reporters; Michael Usher, Charles Wooley & Liz Hayes as they bring you News & Currents Af fairs from around the Globe.	9:00 AM G DAY 5 CRICKET – THE ASHES TEST 4 CRICKET SHOW DAY 5 CONTINUES....	9:00am	8:30 PM G OFF THE MAP – EP#11/13 - Everything's as It Should Be	4:30 PM G KIDS KONA
8:30 PM MAO SUNDAY NIGHT MOVIE FROZEN RIVER	12:00 pm G THE SHAK S2 EP#33/75	10:20am	9:30 PM G EMTV NEWS REPLAYfollowed by the Australia Network	5:00 PM G THE SHAK Series 2 Ep#35/75
10:00 PM G HILLSONGRpt...	5:00 PM G AMAZING SPIES – EP#5/26	12:10		5:30 PM G TRICKY TV S3 – Ep#14/20
10:30 PM G EMTV NEWS – Replayfollowed by the Australia Network	5:55 PM G CRIME STOPPERS	13:50	TRINDE JANUERI 1, 2014	5:57 PM G CRIME STOPPERS
	6:00 PM G EMTV NATIONAL NEWS			6:00 PM G EMTV NATIONAL NEWS
	7:00 PM G 2013 – YEAR IN REVIEW SPORTS MINISTRY			7:00 AM PGR FACT FILES
	8:00 PM PG HOMELAND S2 EP#12/12: - Season Finale			8:00 PM G OUR PORT MORESBY EP#08
	9:00 PM G C-COLA SPORTS SCENE	3:30 PM	5:00 AM G JOYCE MEYER	8:30 PM G TOK PIKSA Ep#48– Repeat....
	9:30 PM G EMTV NEWS REPLAYfollowed by the Australia Network	4:00 PM	5:30 AM G EMTV NEWS REPLAY	9:00 PM M HOSTAGES – EP#3
		4:30 PM G KIDS KONA	6:30 AM G TODAY	10:00 PM G NEWS REPLAYfollowed by the Australia Network
		5:00 PM G THE SHAK Series 2 Ep#34/75	9:00am	
		5:30 PM G ESCAPE FROM SCORPION I	10:45am	
		6:00 PM G EMTV NATIONAL NEWS	13:10	
4:00 AM G AUSTRALIA NETWORK			MALOLO CLUB Finding Nemo The Avengers Spiderman Returns	
5:00 AM G JOYCE MEYER	TUNDE DESEMBER 31, 2013			

Ol Progam na Kilok i ken tenis oltaim...

Wiken foto



AMAMASIM KRISMAS: Ol dispela liklik manki , (L-R) Bosco, Darrel, Jamie na Ebony i amamas pilai long nambis bilong So-hano Ailan, Otonomes Rijon bilong Bogenvil, long Krismas taim. Ol bin go wantaim ol mama na ol anti bilong ol long mal-olo na amamasim Krismas de bilong ol long ailan. *Poto: Niko Numana*



Ol meri long Andra Ailan, Manus i welkamim Gavana bilong Nesanel Kapitel Distrik, Powes Parkop na lain bilong em, taim ol bin go long ailan na givim krismas presen olsem ol musikel instramen i go long ol yut bilong ailan. *Poto: Midia Yunit bilong Gavana.*



SIOS POROMAN GRUP: OL Luteran Sios Jayapura wimen kalsa grup i wok poroman wantaim ol PNG Luteran Sios grup. *Poto: Paulus Tali*

Raun wantaim Kanage olgeta wik

Banana Boat

KANAGE go baim ol kaikai samting na taim em i lusim stoa, ol woklain givim em sampela tiket na ol i tokim em olsem, "Paps, raitim nem na atres bilong yu na putim long dro bai yu inap long winim planti samting tru long krismas." Kanage harim tasol na em i tokim ol woklain bilong SVS olsem, sapos mi win em SVS bai mi winim na bai yupela olgeta kisim wan-wan samting long stua long krismas. Olgeta harim tasol na ol i tok, "Paps, i no stua bai yu winim. Em ol kaikai samting na tu banana bot." Kanage paul na tokim ol olsem, em bot ol i wokim long banana ah? Man olgeta woklain i lap na tokim em olsem, paps maski yu go na stap gut long krismas na sapos yu laki bai yu winim banana bot.

WIKSMAN
2MAIL HIL

"I come from the stua"

WANPELA moning Kanage i go baim tinpis long stua na wokabaut i kam



bek na bungim wanpela waitman long rot. Waitman i kirap na tok moning long Kanage. Waitman ya askim Kanage, "Where did you come from?" Kanage i bekim, "I come from the stua". Waitman askim gen, "What did you do there?" Stail Kanage bekim, "To bought a tinpis". Waitman askim gen, "What are you going to do with that tinpis?" Kanage bekim las wan, "Jas to eat angens the rais!"

LT
Kavieng

Kidim feelings

PAPAS Kanage em bilong Suon ples long Erap, Morobe Provins. Wanpela taim ol lain bilong em long Kimbe salim tok long em long kam raun

lukim ol. Kanage i go kisim ol lip brus bilong em long gaden na pasim ol redi long go long Kimbe. Lapun Kanage kalap long sip na i go long Kimbe. Wanpela de, lapun Kanage kisim ol lip brus bilong em na i go long maket long salim. Long maket, lapun Kanage lukim wanpela yangpela meri. Lapun Kanage trai lek na wok long wokim ai long meri i stap. Meri ya i no bisi long Kanage na em wokabaut i go. Kanage wokabaut hariap i go long baksait bilong meri ya na holim han bilong em. Meri ya kirap nogut na tok inglis: 'Hey, what's wrong with you?' Papa Kanage bekim tasol olsem: 'I jus akism yu bilong kidim feelings!' meri ya kros na tok: 'Plis, I am not your partner'. Taim lapun Kanage harim dispela toktok, papa ya paul olgeta na tok: 'That's olrait. I just want to be your pren for nau tasol'. Bekim bilong Kanage wokim na ol man meri long maket holim bel tasol na kaikai pinga.

Yabi Nain
Erap

Ol skwat! Teksim ol gutpela Kanage tok pilai i kam long:

Txt: 72356149

Mi wari na mi laikim helpim

Dia Laipain

MI GAT wanpela rol modul o man o meri i soim gutpela pasin long laip mi ken bihainim. Na dispela rol modul bilong mi i bin lusim skul long Gret 6 planti yia i go pinis long wanpela longwe praimer skul long wanpela provins long dispela kantri.

Dispela man i no bin laik bai ol i kolim em long wanpela Gret 6 dropaut husat i no inap long kamap wanpela gutpela man i mekim wanpela gutpela samting long laip bilong em. Olsem na Laipain, dispela man i bin lusim ples bilong em na go stap long taun na painim wanem samting em i laikim long en.

Em go long taun na stap wantaim wanpela famili we i bin lukautim em. Taim em i stap wantaim ol, em i no stap nating, nogat. Em i stat long bungim ol sof dring botol na ken ol man i dring pinis na tromoim long en, na ol narapela liklik wok long kisim mani long en.

Taim em i bungim inap mani, em i stat long peim skul fi bilong em yet stat long Gret 7 inap long Gret 12. Bihain long dispela, em i go long Yunivesiti bilong PNG na stadi long lo skul. Nau em i kamap wanpela loya na nau i wok wantaim wanpela lo kampani long kantri.

Hevi bilong mi em, mi wanpela skul dropout tu ya. Na planti taim, mi laik bihainim pasin bilong dispela man tasol ol samting i no wok gut long mi. Nau mi kros i stap na pilim olsem nogat wanpela gutpela samting bai kamap long laip bilong mi. Bai mi mekim wanem samting long helpim mi yet?

Plis Laipain, inap yu painim sampela rot long helpim mi?

Role Models Peace Seeker

Dia Pren,

Mipela i amamas olsem yu tokim mipela long win stori bilong rol modul bilong yu na man we ol hatwok bilong em yu amamas long en na yu laik bihainim long en. Dispela rol modul i bilong yu tasol mipela i pilim olsem em i rol modul long planti tausen narapela



pipel long PNG husat i stap long wankain wari na laip olsem long yu.

Pren, mipela i laikim yu long save olsem long wokabaut long laip, yu mas wokim ol plen, baset i makim taim na fokus long ol driman na gol bilong yu. Mipela i bilip olsem dispela bai kamapim gutpela samting long laip bilong wanpela taim ol i laik wokim ol samting bai bagarapim sindaun na laip bilong ol.

Taim wanpela man i laik wokim wanpela samting, mipela i bilip olsem i moabeta long gat bilip long em yet bikos no gat narapela bai gat strongpela tingting long mekim samting, tasol yu yet. Pren, mipela i bilip olsem rol modul bilong yu i go pas pinis long soim rot long yu i bihainim sapos yu laik mekim gutpela samting long laip bilong yu. Yu ken tokim yu olsem sapos em i ken mekim, mi ken mekim tu.

Mipela i luksave olsem rol modul bilong yu i bin lusim skul long Gret 6 tasol mipela i bilip tu olsem sampela samting i bin mas mekim em i lusim ples long painim samting i ken givim em gutpela sans long laip.

Em bin kisim planti yia long kamap long mak em i stap long em tude. Em bin mas lukim tu olsem em i no laik sindaun nating na lukim ol wanskul bilong em i skruim skul long apa level na kisim gutpela laip, tasol em bin laik kamap olsem wanpela long ol.

Pren, yu wanpela skul dropaut pinis na yu bin laik bihainim rol modul bilong yu tasol yu wok long pundaun. Nau yu kros i stap na askim watpo dispela i kamap long yu? Em i gutpela long kros na tok mi no inap wokim wanpela gutpela samting long mi yet. Mipela i bilip olsem i ken gutpela long yu i kros na

bai mekim yu i wok hat moa long inapim gol bilong yu. Pren, noken ting olsem yu no inap long wanem samting yu wokim. I moabeta yu kisim sampela luksave na lusim ol poroman yu gat nau bikos ol i ken mekim yu bagarapim tingting bilong yu. Mipela i bilip olsem ol bai no inap helpim yu long mekim gut long skul na laip bilong yu.

Pren, mipela i laik strongim yu long tokim ol long laik bilong yu long skruim skul na sapos ol i gat wankain wari olsem yu, yu ken toktok tu long ol. Laipain i bilip olsem long dispela kantri, PNG, i go het gut, em i wok bilong ol manmeri i kisim skul long mekim dispela.

Mipela i bilip olsem em i taim ol yangpela pipel olsem yu long tingting gut long wanem samting yu ken mekim sapos yu kisim gutpela edukesen. Pren, mipela i askim yu long save olsem yu wanpela skul drop aut, tasol ol samting i no pinis hia, nogat. Yu ken go het na traun na i napim ol driman bilong yu.

Sapos yu tok olsem yu lus, bai yu stap olsem wanpela dropaut oltaim. Na dispela bai givim yu wari na hetpen, long famili bilong yu na kantri tu. Tasol yum as muv i go fowet, wok hat na mekim gut. Yu ken kamap olsem gutpela rol modul long ol narapela pikinini na ol yangpela.

Pren, God i save totkok long manmeri i stap long ol kain wari na hevi na em i laik toktok long yu tude sapos yu opim lewa bilong yu long em.

Ritim buk bilong ol Proveb 4:10-13.

Laipain

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.
Laipain

PNG Maikrofainens i groim SME

DISPELA nem John Soto em bikipela nem long Pot Mosbi long baim emit botol. John Soto em i bilong Bota wanpisin, Wabag long Enga provins.

Dispela em liklik stori bilong rot wanpela man nating bilong ples i kamap bikipela long SME bisnis long botol industri long Mosbi.

Mista Soto i kam long Mosbi long 1972 taim em i gat kris-mas 18. Em i no gat save bilong skul long painim ol wok.

"Mi statim bisnis bilong mi wantaim K20. Mi bin baim emti botol: Mista Soto i toktok wantaim wari.

Mista Soto bin baim botol long K20 na long sampela yia bisnis bilong em i gro na em i wok long baim moa botol na salim i go long bikipela kampani bilong baim botol na ol kampani i save mekim dring.

Mista Soto i stat gut tru wantaim bikipela hatwok na nau em i gat nem na papa bilong kampani nau ol i kolim JS Botol Distributa.

"Kain ol bisnis man olsem mi, em i hat tumas long kisim mani na helpim long ol bikipela benk bikos mipela i nogat pepa. Ol bikipela komesel benk i save askim long kainkain ol pepa na mi no klia"

Soto i tok.

Mista Soto i mekim botol bisnis long strit long Mosbi na i baim wanpela kar long K400. Bikipela hat na gutpela menesmen i lukim SP Brewery i makim Soto olsem wanpela man tasol bai i baim emit botol long Mosbi na salim long SP Brewery.

Mista Soto em i wanpela hatwok man na tu i save daunim em yet bikos em i save olsem em i kam long hatpela rot long kamap bisnisan.

Nau Soto i go insait long ritel bisnis long salim kain kain bia we SP Brewery i wokim na em i go het long baim na salim ol emti botol.

Menesa bilong Lending long PNG Maikro Fainens Ltd long Boroko, Samson Passingan i tok em i amamas long makim benk na wok wantaim Soto long sait bilong dinau mani long benk. Em i tok em gutpela moa long wok wantaim ol pipel i kam long kainkain hap na i gat kain kain save.

Long dispela taim i lukim Pot Mosbi Maikro Fainens Limited (PML) aninit long SME lon fesiliti we i save helpim samting bilong wok bisnis na kisim ol asset o helpim Soto klostu long



John Soto namel wantaim ol femili memba long fran bilong nupela kar we PML i baim bilong em.

K500,000 long groim liklik bisnis bilong em.

Sinai brens menesa bilong PML, Danny Koka i tok Mista Soto i no nupela long PML.

Em i tok benk bin helpim Mista Soto long moa long K100,000 long baim ol samting bilong bisnis na i givim K280,000 long groim bisnis wantaim fok-

lip masin moa i kosim K87,000 na planti moa.

Maski Mista Soto i no gat skul save, em i save kisim bikipela dinau long benk long

mekim bisnis na save bekim gut.

Sapos Mista Soto i ken mekim olsem wanem long yumi ol arapela.

BSP helpim ol lain kisim bagarap long Taifun Yolanda

MANDE 23 Desemba, 2013, Benk Saut Pasifik i givim K10,000 i go long Filipino Asosiesen bilong Papua Niugini (FAPNG) long sapotim wok bilong bungim mani long helpim ol pipel bilong Filipins husat i bungim taim no gut long hevi bilong Taifun Yolanda.

Taifun Haiyan, o narapela nem Taifun Yolanda i bin kisim Filipins long mun No-

vemba na i kilim i dai moa long 6,000 pipel.

Filipino Asosiesen bilong PNG i wok yet long bungim mani long helpim ol pipel long kantri bilong ol husat i kisim hevi long dispela strongpela win. Dispela taim ol i kisim bikipela sapot long Benk Saut Pasifik (BSP).

Roel Santa Cruz, Presiden bilong Filipino Asosiesen long PNG, i amamas tru long

kisim dispela donesen.

"Taifunn Haiyan, i kamap long Filipins, i bin wanpela strongpela saiklon o win na em i bagarapim tru ol ples long Saut Is Esia, olsem long Filipins," Mista Cruz i tok.

"Long dispela taim i kam, FAPNG i stat long mekim wok long bungim mani long helpim ol lain i lusim olgeta samting wantaim haus bilong ol na i no gat ples moa

long stap. Mipela i tok tenkyu tru long olgeta helpim i kam pinis." Em i tok.

"Long dispela taim bilong pesto de, mipela i amamas long sapot bilong BSP."

"Dispela mani bai helpim long baim ol saplai bilong ol pipel i stap nau long ol ke senta, inap long taim ol i painim hap long go stap," em i tok.

Papagraun bilong Mt Kare i bung wantaim Summit Limited

Stanley Nondol i raitim

OL papagraun bilong Mt Kare Silva na Gol projek long Piala long Enga Provins i bung long Mt Kare long projek sait long makim baundri bilong maining.

Mt Kare i gat silva na Gol na Summit Developmen limited i gat laisens long kamap developa long mekim wok maining.

Ol papagraun long tupela provins i stap long boda we gol na silva i stap i bung na i lusim ples na wokabaut i kam na bung long projek sait.

Papagraun bilong Mt Kare i gat grup, wanpela bilong Piala long Enga na narapela bilong Tari long Hela provins.

Gol na kopa projek bilong Mt Kare i stap long boda bilong tupela provins.

Summit Development Limited i kamapim wanpela konsalten kampani long stretim tupela papagraun long wok maining bai kamap. Dispela i kamap long stretim ol papagraun long len investigesen stadi o wok painim bilong graun.

Aninit long wok painim bilong makim papagraun, i gat tupela hap, Lens investigesen Stadi (LIS) na Lens investigesen Ripot (LIR).

Stadi bilong LIS i pinis long mun Ogas 2012 na kampani i stretim gut na luk-save long papagraun pinis.

Wok painim bilong LIS i wok long kamap yet na ol papagraun na ol mastamak i wokabaut long projek eria long mekim isi long Lens Konsalten long i ken kisim gutpela infomesen long kamapim fainal Lens Investigesen Ripot.

Komyuniti Afes Menesa bilong Summit Development Limited, Joe Pias i tok dispela wokabaut bilong papagraun i namba wan taim long Papua Niugini.

Em i tok Summit Developmen Limited i kamapim dispela long kamapim gutpela luksave long ol papagraun bilong gol na silva projek long ol kisim gutpela sevis taim wok maining i kirap.

Dispela em bikipela projek long kantri na gavman i tok Summit Developmen Limited i gat laisens pinis na bai go het long wok main bihain long planti aluvial maining i kamap long planti yia.



FAPNG Presiden Roel Santa Cruz (han kais) i kisim donesen bilong BSP sponsa long Kodineta, Michelle Wong.

Karim beg buai i helpim ol yut long amamasim Krismas

James G. Kila i raitim

OL YUT o yangpela lain long liklik taun long Ramu Suga long Gusap, Madang provins i bin kisim wangepela kain gutpela 'blesing' stret pas-taim long Krismas na Nu Yia.

Dispela blesing i pundaun long ol bihain long hevi o bagarap i bin kamap long Bora bris na ol bikipela trak na PMV bas tu i no inap katim wara i go kam long hapsait.

Taim dispela hevi i bin kamap, em i bin givim gutpela sans stret long ol yangpela man bilong ol setelmen long Ramu Suga mekim liklik mani taim ol helpim ol buai baia bilong hailans long karim ol beg buai bilong ol dispela lain i go kam long hapsait long wara.

Wantok Niuspepa i bin stap long Bora bris long dispela taim na i lukim ol buai baia bilong hailans i bin

baim planti buai beg na karim long PMV bas i go tasol Bora riva i tait tumas na PMV bas i no inap go long hapsait, olsem na ol i yusim ol yut long karim buai beg i go long hapsait na baim ol yut. Long hapsait em ol buai baia yet i baim ol arapela PMV long karim buai beg bilong ol i go antap long Hailans rijon.

Buai tred i bin no gat malolo long Krismas bikos ol lain baia bilong Hailans i pulim lain i go kam long Madang long baim buai long 4-mail maket, Balasiko na tu, long ol ples long not kos rot (NCR) na Ramu bes kemp. Sampela i kisim bot i go olsem long Long ailan tu long baim buai.

Tasol bipo long Krismas, hevi i bin kamap long Bora bris taim wara-tait i rausim ol sapot aninit long bris na ol PMV bas na ol bikepela trak i no inap long katim i go long hapsait. Taim dispela i kamap ol yangpela man bilong Ramu Suga taun i helpim ol buai baia long karim beg buai bilong ol i go

kam long hapsait na kisim liklik mani long sevis bilong.

Wangepela yut bilong Sankiang viles klostu long Ramu Suga taun, Peter Jonathan i tokim Wantok olsem ol i amamas long helpim ol lain husat i baim planti beg buai na i no inap long karim i go long hapsait bikos long wara tait.

"Mipela i kisim liklik mani tasol mi wantaim ol grup bilong mi amamas tasol bikos mipela bai bungim mani na amamasim Krismas na Nu Yia wantaim koins mipela i kisim," Peter i tok.

Em i tok ol i no sasim bikipela mani long ol lain papa bilong beg buai. Ol i sasim ol K2 long karim ol beg buai i go long hapsait long Bora riva.

"Mi wokim pinis K24 long karim 12-pela buai beg i go long hapsait, tasol i gat moa beg yet long karim," Peter i tokim Wantok.

Em i tok ol narapela poroman bilong em tu i kisim moa long K20 na K30 olsem na ating ol bai mekim bikipela pati stret.



Ol yut i brukim tait na karim beg buai i go long hapsait. Poto: James G. Kila

Kantri i sot long K1.26 bilien

Stanley Nondol i raitim

BENK bilong Papua Niugini i tokaut olsem kantri i rekodim K1.26 bilien dinau i defisit insait long 9 pela mun long 2013.

Dispela sot bilong mani ol i kolim Balens ov Pemen we BPNG i save rekodim olgeta trenseksen bilong PNG long guds na sevis na mani i go kam long kantri na skelim wankain wok wantaim ol arapela kantri.

Kwateli Ripot bilong 2013 bilong BPNG i bin kam aut long las wik. Ripot i soim olsem bikipela mani i go aut long kantri na liklik tasol i kam insait.

Dispela i soim PNG i baim bikipela mani long ol sevis na samting I kam long ol autsait kantri.

Gavana bilong BPNG Loi Bakani i tok Foren Risev mani long BPNG long arere bilong Septemba i sanap long K7.24 bilien o \$US 3 bilien.

Mista Bakani i tok benk i mekim K466 milien long Septemba kwata. Na gavman i mekim K105 milien long treseri bil.

Long wankain taim mista Bakani i tok lokal karensi o hevi bilong Kina i bin pundaun egensim mani bilong ol arapela kantri

Mista Bakani i tok hevi bilong kina i pundaun bikos kantri i baim planti samting i kam long autsait kantri na i no mekim inap mani long ol autsait kantri.

Mista Bakani i tok BPNG i yusim Foren Risev mani long baim bek strong bilong Kina na lukim mani long foren risev i kam daun long US\$2.859 bilien.

Mista Bakani i tok benk i mekim



BPNG GAVANA: Loi Bakani

samplea nupela rot long bungim dispela hevi bilong Kina i pundaun, wangepela bilong em inta-benk maket eksens reit na eksenis reit aninit long dispela i stap long US\$4. Egensim kina.

Mista Bakani i tok BPNG i gat inap mani long risev na i mekim planti rot pinis long kisim bek strong bilong kina.

Strong bilong Kina i pundaun long arere bilong 2012 na long 2013 na lukim prais bilong kaikai na samting i go antap. Dispela i mekim laip bilong planti manmeri i go hat olgeta.

Planti tokotk i kamap long dispela tasol gavman i tok em i no gat kontrol.

BPNG i yusim US\$ 2 bilien long risev mani long baim strong bilong kina bikos planti Kina i go aut na nogat inap dola kam in long baim kina na kisim strong bilong Kina i go antap.



TOK SORI

Leit Pater Franz Herkenhoff, SM
Meppen, Germany



Veronica Hatutasi na famili i salim bikipela toksori tru i go long famili na Marist Katolik Kongriksen long Gemani long dai bilong Pater Franz Herkenhoff, SM, i gat 84 krismas, long bikmoning Fonde Desemba 26, 2013. Em bin dai long Meppen, hap bilong ol Geman Marist komyuniti long Gemani yet.

Pater Franz i bin sik long longpela taim wantaim sik suga na nau i lusim laip bilong em.

Leit Pater Franz i bin wok olsem misinari moa long 30 yia long planti peris insait long Bogenvil Daiosis. Em bin wangepela long ol misinari husat i bin stap bek long Bogenvil taim pait i go nogut, na skruim wok misin i stap. Tasol em bin lusim Bogenvil na go bek long Gemani long yia 1994 bikos em bin sik. Maski em i stap long Gemani, lewa bilong em i stap oltaim wantaim Bogenvil na pipel bilong em, na PNG tu. Em i gat planti gutpela poroman long Bogenvil.

Mi na famili bilong mi i gat bikipela sori tru long lusim yu-PAPA- bikos long las 18 krismas, yu kamap olsem gutpela Papa na pren.

Tenkyu Gemani long givim Bogenvil na PNG wangepela gutpela misinari na pren long kontribusen bilong em long sios na developmen bilong Bogenvil na PNG.

Famili bilong mi bai no inap lus tingting long bikipela na gutpela sapot yu save givim long mipela inap yu pasim ai long dispela wik.

Mipela i pre bai yu painim gutpela malolo wantaim Jisas na Mama Maria long Paradais. Mipela i pre tu long famili na Marist komyuniti long Gemani long Bikman i ken givim belisi long ol long dispela taim bilong sori.



Tok Sori i kam long Veronica Hatutasi na Famili Rainbow, Pot Mosbi, PNG.



Ramu NiCo Redi long Bungim Salens Bilong 2014

RAMU NiCo Menesmen (MCC) bai stap strong yet long wok i go kamapim ful prodaksen long yia 2015 na givim helpim i go yet long ol stekholdas.

Tude prais bilong nikel long intanesenel metal maket i stap daunbilo, tasol i gat taim bihain em bai surik i go antap na Ramu Nikel i wok hat stret nau.

Bod Siaman na Presiden bilong Ramu NiCo Menesmen (MCC) Ltd, Zhao Shimin i mekim dispela strongpela toktok.

Siaman Zhao i tok olsem wantaim helpim bilong olgeta stekholda, Ramu NiCo i bin abrusim na go egensim planti salens long rot em i bihainim i kam tude, na long mun Oktoba 2013 em i lukim kamap bilong 50% mak bilong disain bilong wok-pinis na long mun Novemba Projek i lukim tu 50% disain kapasiti i go het yet.

Dispela win-mak bilong prodaksen i kamap maski olsem Projek i wok long bungim hevi long sait long nogat win-mani na tu Kampani i lusim bikipela mani long sait long baim ol samting bikos prodaksen i daunbilo na prais bilong nikel tu em daunbilo.

Minista bilong Maining, Byron Chan i tokaut olsem sainim bilong Ramu Projek Rivais MOA long las yia 2013 em bikipela samting na histori stret long laip bilong Ramu NiCo Projek na pipel bilong Usino Bundi na Madang wantaim.

Olsem na Minista Chan i askim na tokim ol papagraun insait long projek eria long redim ol yet gut long kisim ol helpim we bai i kam aninit long Rivais MOA.

"Mi lain tokim yupela ol lain papagraun olsem bai i gat bikipela ol invesmen na developmen bai kam long yupela. Mi lukim olsem planti sans long wok developmen i stap insait long dispela Rivais MOA, tasol mi laikim yupela tu long lukluk i go autsait long kisim sampela moa helpim," Minista Chan i tok.

Em i tok olsem dispela Rivais MOA we NEC i tok-orait long en long Oktoba 12, 2013. lukim Nesenel Gavman bai putim mani long wokim ol infrastraksa developmen olsem tupela liklik taun, wanpela bilong Usino-Bundi na arapela long Basamuk long Raikos distrik.

Em i tok gavman i lukluk tu long stretim Raikos rot long nambis na Usino-Bundi rot na peim arapela K10 milion sid capital na luksave long Ramu Nikel Faundesen olsem wanpela enjin rum bilong lukautim developmen na i givim K3 milien insait long Infrastraksa Developmen Grent insait long 20-yia bilong Projek laip em Faundesen bai lukautim.

"Provinsal Gavman bilong yupela i tokaut pinis long givim K1 milien i go long saut-rot long Kurumbukari na tu kamapim Enviromen Yunit insait long Madang Provinsal Edministresen," Mista Chan i tok.

Minista Chan i tokaut tu olsem ol Joint Vensa bilong Ramu Projek i givim tu bikipela risoses olsem K5 milien i go long Saut Rot

divelopmen long Kurumbukari, na i helpim ol lenona asosesen (LOA) wantaim K50,000 olgeta yia long komuniti edukesen asisten program, K80,000 long wanpela maikro kredit skim, K80,000 long wan wan yia long helt skim na wok bilong rihabiltesen plen bilong Ramu NiCo long taim main i pas.

Mista Chan i askim olgeta lain papagraun long wok gut long ol sapot ol i kisim insait long Rivais MOA na long wankain taim tu sapotim Ramu NiCo long kamapim gut wok.

"Mi laik askim olgeta lain papagraun long sindaun na toktok wantaim na stretim wanem kain toktok ol hevi ol i gat na noken bagaram operesen bilong Kampani," Minista Chan i tok.

Em i tok olsem Ramu NiCo long nau yet i wok long bungim planti salens bikos prais bilong nikel long wol i daunbilo na em i askim olgeta stekholda na ol lain papagraun long givim moa sapot i go long kampani long taim nogut olsem.

"Yumi mas wok bung wantaim long givim sekuriti long dispela Projek na em i ken wok gut na mipela olgeta i ken kisim helpim," Mista Chan i tok.

"Ramu NiCo Projek i go insait long trail prodaksen, tasol mipela i bungim yet ol hevi na bikipela salens yet. Intanesenel nikel maket prais i pundaun long US\$28.000 i go daun US\$14,000 long wan wan tan."

"Wan kain ol nikel main olsem long wol i katim daun namba bilong ol wokman o pasim wok olgeta, tasol Ramu NiCo i stat nau tasol long operesen na i wok long bungim yet planti hevi long samting em i yusim na tu prodaksen i daunbilo." Mista Zhao i tok.

Siaman Zhao i tok long stat bilong operesen Projek i bin bungim planti hevi na planti samting i pasim rot tasol Kampani i abrusim ol dispela hevi na i bringim kamap gut Prodaksen kwaliti na redi long bringim win-mani long Projek.

"Olgeta Memba bilong Ramu NiCo Menesmen Limited bai givim taim na mekim gut wok na pait egensim ol salens na bai yumi olgeta luksave long komesal operesen bilong Projek na luksave long wanem mak ol gol mipela i lukm long winim."

"Ramu NiCo i sanap strong long develop, wokim kamap na ronim Ramu NiCo Projek long interest bilong kantri na tu intares bilong ol pipel bilong Madang," Mista Zhao i tok.

1. Wok i go het long KBK Main.
2. Ol wokman long KBK Main.
3. Expot long Basamuk.
4. Sip redi long go ovasis wantaim MHP.



salens bilong graun na masin bilong mekim wok.

Ol dispela namba i soim kliia mak bilong wok mipela i pinisim:

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biling i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komuniti'

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Kurumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

Tambu bilong Si Kukamba i mas stap yet

SIAMERI bilong Kiriwina Kostal Fising Koperativ Sosaiti (KCFCS), Esther Martin i singaut long Nesenal piseris Atoriti (NFA) long em i mas pinisim wok bilong ol long kauntim ol si kukamba na givim long ol komyuniti arere long solwara, klia stadi bilong si kukamba piseri long PNG.

Misis Martin i mekim dispela singaut bikos ol pipel bilong Caterets na Mortlock Ailan long Otonomes Rijen bilong Bogenvil, i tokaut olsem ol i laikim NFA long opim gen si kukamba piseri bihain long NFA i surukim gen tambu bilong kisim si kukamba i long tripela moa yia. NFA Bod i bin kamapim tambu (Moratorium) long rausim si kukamba long 2009 na long dispela yia tasol, ol i surukim moa taim i go bikos ol i no kisim gut save yet long namba bilong ol si kukamba insait long solwara.

KCFCS i makim ol fisaman na ol papa bilong ol abus bilong solwara long Kiriwina Distrik long Millen Be Provins. Dispela sosait i gat 200 rejista memba na as tingting bilong em i bilong strongim gutpela pasin bilong lukautim na kisim ol pis na arapela abus bilong solwara insait long solwara bilong ol. Na ol ailan bilong ol long ol i mas gat bilong kaikai na tu, long pipel i kam salim na kisim mani long en.

Sosaiti i ting olsem insait long tripela yia i bilong dispela tambu, NFA i bin gat inap taim long kisim moa save long ol eria bilong ol samting bilong solwara na ol i ken luksave long wanem helpim i stap bilong kamapim ikonomi k ripot. Dispela ripot i ken soim mak bilong si kukamba namba na strong bilong em long kamapim moa na tu long luksave olsem ol

populesen bilong dispela abus i bin gro yet o nogat, i nap long ol i ken kisim planti bilong salim o nogat.

Misis Martin i tokaut olsem ol painim aut bilong dispela stadi i ken tokaut long as tingting we ol save man i painimaut long en.

"Mipela ken luksave stret long wanem kain bagarap bai i kam long namba bilong si kukamba long taim ol bikpela pis bisnis i rausim pis nating nating. Ol lokol lobi grup o politiks i no ken pusim NFA long opim gen wok bilong rausim pis, sapos stadi i tok em i no redi yet," em i tok.

KCFCS i laikim NFA long pinisim dispela wok stadi bilong namba bilong si kukamba bisnis, na kamapim ol we bilong mensesim plen bilong ol ailan komyuniti long lukautim BDM piseri wantaim ol arapela pis na abus long solwara.

JICA trening long kilim rais binatang kamap long Basken viles

James G. Kila i raitim

TUPELA teknikal saveman bilong Japan Intanesenel Koporesen Ejensi (JICA) i bin givim praktikal trening long ol rais fama long wanpela rais gaden long plkes Basken long Sumgilbar lokol level gavman (LLG) long Sumkar distrik, Madang provins.

Dispela tupela saveman em Masaya Matsumura na Mista Kanamoto. Ol i bin go long Basken wantaim tripela lain model fama na agrikalsa opisa bilong Milen Be provins long mekim prektikal wok long luksave long ol binatang no gut i save kaikai bun bilong rais na bagarapim rais long gro gut na karim kaikai.

Moa long 50 fama i bin stap long dispela prektikal trening i kamap aninit long JICA Projek long Promotim Smolda Rais Prodaksen Hap namba 2. Madang provins em i wanpela long ol pilot provins we dispela projek i karamapim.

JICA wantaim Madang Dipatmen ov Agrikalsa na Laipstok (DAL) i bin makim sampela ol modol fama long Madang na tu, i bringim ol sampela opisa bilong DAL na ol lain i save givim skul



JICA teknikal saveman Masaya Matsumura i soim ol lain yusim net long kisim ol binatang nogut long rais gaden long Basken. Foto: James G. Kila

long rais long stap insait long wanpela trening na raun i go long ples Basken long lukluk long praktikal sait.

Ol DAL opis long Madang i bin makim ples Basken long mekim praktikal bikos planti smolholda rais fama i stap long dispela ples. Na intres long groim rais i antap tru.

Narapela samting tu em, ol fama long ples Basken viles i bungim sampela hevi we binatang nogut i wok long

kilim ol rais long olpela gaden, na dispela trening we JICA wantaim ol teknikal opisa bilong DAL em long givim skul na tingting long ol fama long wanem rot long daunim na stopim ol dispela binatang nogut.

Long trening, Mista Matsumura i soim ol fama long wanem rot long luksave long ol binatang i save kaikai rais olsem stem-bora, raisbag na ol arapela.

Dolly

Em bai mekim yu laikim sampela moa!

PROUDLY

RD TUNA CANNERS LTD.

Balensim Netbal na skul

Isaac Liri i raitim

LONG dispela wik spot laipstail, bai yumi lukluk long wanpela yangpela meri husat i bin pilai netbal long lokel, provinsal, nesanel na intanesenel levul. Em i no save pilai netbal tasol, em i save balensim netbal laip bilong en wantaim skul laip bilong en.

Marypaul Buehler i pinisim namba 3 yia bilong em long Yunivesiti bilong Papua Niugini long Pot Mosbi long dispela yia, em i stadim Jeoloji.

Long mun Julai 1992, mama bilong Marypaul i karim em long Pot Mosbi, na nau em i gat 21 krismas.

Papa bilong Marypaul, Frank Buehler, i bilong Weesen long Switzerland, na mama bilong en, Anna Buehler, i bilong Lese Kavora long Galp provins, tasol Marypaul i bikipela long 15 mail, ausait tasol long Pot Mosbi.

Marypaul em i laspela long famili bilong em. Em i gat 3-pela bikipela brata, Stephen, Christian na Alex.

Marypaul i bin stat pilai netbal taim em i gat 6-pela krismas, taim em i stap long gret 1 long Gordon Intenesenel Skul long Pot Mosbi.

Posisen bilong Marypaul long netbal em gol suta.

Mama bilong Marypaul, Anna Buehler em i wanpela meri husat i bin strongim Marypaul long pilai Netbal. Marypaul i save stap klostu long mama bilong em olgeta taim, na em i lainim planti samting bilong Netbal long mama bilong en.

Mama bilong Marypaul i bin stap olsem kosa bilong netbal tim bilong Marypaul long Gordon Intenesenel Skul long gret 1 i go inap gret 8.

“Wanpela bikipela samting we mi lainim long mama bilong mi, husat em laip kosa bilong mi tu, em long trening strong moa yet. Sapos wanpela samting i hat tumas, mi mas oltaim trening strong, long wanem em i driman bilong mi long kamap wanpela gutpela netbal pilaia.” Marypaul i tok.

Klap we Marypaul i save pilai wantaim long Pot Mosbi, em Snax Mermaids Netbal Klap, em i bin stat pilai wantaim ol long 2010, na nau yet em i pilai wantaim ol yet.

Bipo long em i pilai wantaim ol Snax Mermaids, em i bin save pilai long Lowa Sogeri Netbal Asosiesen wantaim tim ol i kolim long Umi Neibas Klap. Na bipo long dispela em i bin pilai wantaim anda 15 bilong Esco Telstars long Pot Mosbi Nesanel Asosiesen.

Taim Marypaul i pilai wantaim ol Snax Mermaids, ol selekta bilong Pot Mosbi i bin selektim em long pilai wantaim tim NCD long PNG Gems long 2009. Na long hap, ol selekta bilong nesanel tim, Pepes, i bin lukim em na selektim em long stap insait long Pepes skwat.

Namba wan taim bilong Marypaul long makim kantri long pilai netbal, em long 2011 taim em i stap wantaim Pepes skwat na pilai long Pasifik Netbal Siries (PNS) long Pot Mosbi.

Taim Marypaul i bin pilaim namba wan gem bilong em wantaim ol Pepes, em i bin pret liklik na tu, em i bin amamas long wanem em i makim kantri na pilai.

Marypaul i bin tokim *Wantok Niuspepa* olsem em i no liklik wok long balensim skul wok bilong en wantaim netbal laip bilong em. Bikipela samting em long i gat wanpela taim tebol long bihainim long olgeta de.

“Long olgeta wik de, mi save mekim skul wok bilong mi, na bihain long avinun, mi save go trening. Mi no gat planti fri taim long mekim ol arapela wok nabaut.” Marypaul i tok.

Marypaul i tok long sait bilong skul na netbal, em i lukim skul olsem impoten samt-

ing tru long wanem, em bai i helpim em long stap gut long bihain taim.

“Sapos netbal i bin inap long givim mi gutpela laip long bihain taim, bai mi lukluk tasol long netbal, long wanem, em i wanpela samting we mi laikim tru long lewa bilong mi.” Marypaul i tok.

Long ol arapela netbal pilaia, Marypaul i save lukluk antap long Mona Lisa Leka, na Winnie Mavara husat em kepten bilong ol PNG Pepes. Em i tok dispela tupela meri, em ol gutpela netbal pilaia, na em i save pilai wantaim Winnie Mavara, na em i lainim planti gutpela samting long en.

Long sait bilong ol intanesenel netbal pilaia, em i save lukluk antap long Maria Tutaie na Tamapara George. Dispela tupela pilaia i bilong Nu Silan na tupela i ritai pinis.

Nau yet Marypaul i stap long skul malolo, na em wok long trening strong long wanem, em i laik stap insait long PNG tim bilong 2015 Pasifik Gems, na tu, Wol Netbal Sem-pionsip long 2015.

Bikipela driman bilong em long olgeta, em long pilai long Komonwel Gems sapos PNG Pepes i kwalifai long go pilai.

Marypaul i gat bikipela laik tu long helpim ol arapela netbal pilaia long provins bilong em long Galp, na tu, long kantri Papua New Guinea.

Na long sait long Jeoloji, em i laik pinisim skul bilong em, na wok olsem wanpela Jeolojis long kantri, na helpim Papua Niugini long develop i go long neks levul.



Marypaul i pilai wantaim PNG Pepes, em i laik skorim wanpela gol.



Marypaul wantaim unifom bilong en, wanpela driman tu bilong em, em long kamap wanpela Jeolojis na wok insait long Papua Niugini.



Marypaul, namba 4 long lephan, taim em i bin stap olsem gol suta bilong junia PNG tim.



Marypaul wantaim hom tim bilong en, Snax Mermaids.



Marypaul wantaim ol poroman bilong en, taim ol i bin stap long junia skwat.



Marypaul wantaim ol geologis long Tabubil, em i stap long wanpela prektikol bilong em.

Judo program long Goroka

JUDO em i wanpela pilai we i bin kisim bikpela luksave long wol long 1964 Olimpik Gem long Tokyo long Japan.

Namba wan taim bilong Papua Niugini long pilai judo long intanesenel level em long 2012 Olimpik Gem long London.

Nau yet, Papua Niugini Judo Federesen (PNGJF) i wok strong long kisim intres bilong ol manmeri bilong dispela kantri long go insait long pilai judo, na tu, painim ol manmeri husat i gat talen long judo.

Long Papua Niugini, i gat tupela judo klap tasol, na dispela tupela klap i stap long Pot Mosbi.

Long dispela nupela yia 2014, PNGJF bai i wok strong long painim ol manmeri bilong judo long ol arapela hap bilong Papua Niugini, na dispela wok i stat pinis long Goroka long las yia Desemba 16.

As tingting bilong dispela Judo program long Goroka, em long painim ol manmeri husat i gat talen o laik bilong judo, na trenim ol long kamap ol gutpela na strongpela

manmeri bilong judo long nesenel na intanesenel level.

PNGJF i gat strongpela tingting olsem dispela program bai i painim sampela ol gutpela pilaia bilong judo husat i ken karim nem bilong kantri long 2015 Pasifik Gem.

Nesenel Spoting Institut (NSI) long Goroka i sapatim dispela program tu long wanem, ol i lukim dispela program olsem wanpela bikpela samting we i ken strongim judo insait long kantri.

Dispela Judo program we i bin kamap long Desemba 16 na pinis long 21 i no nupela samting long NSI na tu long kantri. Long 2007, i bin gat wanpela arapela judo program we i kamap, na ol i bin kolim long Silva Jubili Graruts Judo Program, na long 2009, i bin gat narapela ken, ol i kolim long Judo Olimpik Solidariti Program.

Long lukluk bilong PNGJF, ol i lukim olsem dispela tupela program we i bin kamap long 2007 na 2009 i bin helpim Papua Niugini long kamap wantaim ol judo etlit husat i save pilai long intanesenel level na go pilai long



Ol manmeri husat i bin stap insait long judo program long Goroka. Sampela bilong ol dispela lain em ol yangpela mangi na meri husat i save skul long ol Praimeri na Hai Skul

2012 Olimpik Gem long London.

Dispela judo program bai i stat gen long Dispela mun Januari na pinis long Februari.

Man we bai i stap olsem

kosa long dispela program em Raymond Ovinou, man husat i bin makim Papua Niugini long judo long 2012 Olimpik Gem. Ol man husat bai i helpim em long sait bilong kosa, em Presiden bi-

long PNGJF John Jambert, sinia etlit bilong Gereka Judo Klap, Mek Loi, na Gabriel Jambert, husat em wanpela Developmen Skwat Memba.

PNGJF i amamas tru long dispela program na tu, long

ol lain husat i sapatim, olsem Papua Niugini Olimpik Komiti (PNGOC), Papua Niugini Spots Komisen (PNGSC), na NSI, long mekim dispela program i kamap.

2014 bai yia bilong soka

PAPUA Niugini Futbal Asosiesen (PNGFA) i stre-tim 2014 plen bilong ol pinis.

Presiden bilong PNGFA, David Chung, i tok long dispela yia, PNGFA bai i kamap wantaim planti ol nupela soka program long helpim ol pilaia long kamap gut.

Mista Chung tok i bin gat planti gutpela na nogut samting long soka insait long kantri long las yia, tasol, Papua Niugini i lainim long ol dispela samting, na bai i mekim gut long dispela nupela yia 2014.

Long ol soka program bilong 2014, Mista Chung i tok ol senia tim bilong Papua Niugini bai i pilaim sampela ol intenesenel gem long strongim ol, na redim ol long ol gem bilong 2018 Wol Kap Kualifaia.

Papua Niugini i no bin pilai long wanpela wol kap yet, na ol i stap namba 194 long wol renking. Planti manmeri insait long kantri bai i lukluk na tok olsem Papua Niugini i no fit long kwalifai long pilai long wol kap. Tasol sapos PNGFA i wok strong long kamapim ol gutpela soka pilaia, Papua Niugini bai inap long kamap gut.

Mista Chung i gat strongpela tingting olsem ol soka fasiliti long Bogenvil, Kimbe na Lae bai i helpim ol soka pilaia long dispela kantri. Long dispela as, PNGFA bai lukluk moa yet long painim mani bilong ol dispela fasiliti na sapatim ol.

Mista Chung i tok dispela yia tu bai i lukim planti ol junia developmen program long trenim ol yangpela soka pilaia, na tu, bai i gat ol trening program bilong ol



Nesenel tim bilong Papua Niugini (Ol Kapul) i trening.

kosa, referi na ol arapela opisal tu.

Na 2015 Pasifik Gems i kamap klostu nau, na Mista Chung i tok em laikim ol soka pilaia bilong Papua Niugini i stap long gutpela mak, na kisim ol gutpela risal. Mista Chung i save olsem em i no isi tu long pilai long Pasifik Gems long wanem i gat ol strongpela soka kantri olsem Solomon Ailan na Vanuatu, na long winim ol dispela tim, Papua Niugini i mas stap long gutpela fom.

Long dispela yia tu, Mista

Chung i tok PNGFA bai i lukluk long helpim na stretim ol soka fasiliti long Bisini Pot Mosbi. Em i tok ol dispela fasiliti i mas stap gut, na yumi ol manmeri bilong dispela kantri i mas lainim long lukautim ol dispela samting.

Long namba wan wik bilong Januari, PNGFA bai holim wanpela bung wantaim olgeta kampani na oge-naisesen husat i save wok wantaim ol, dispela bung em long toktok moa long gutpela bilong soka long Papua Niugini long nau na long taim bihain.

Paol i kamap long Gavanas Kap

LONG Sande 29 mun Desemba, Gren Fainel bilong op sisen ragbi lig Gavanas Kap i bin kamap long Kone Taigas Ovol long Not Waigani long Pot Mosbi.

Gren Fainel gem i bin stap namel long ol Friwei Bampas na Siks Mail Taigas.

Tupela tim i bin pilai gut tru na ol i wokim ol sapota i go wail.

Long pinis bilong namba wan hap, ol Taigas i bin go pas wantaim 16 poin na ol Friwei Bampas i bin stap bihain wantaim 12 poin.

Long las minit bilong dispela gem, bipo long sairen i krai,

Friwei Bampas i bin go pas wantaim sko 20 na ol Taigas i bin stap bihain wantaim 16 poin.

Taim Sairen i bin krai, ol pilaia bilong Taigas i bin skorim wanpela trai tasol referi i no bin mekim wanpela samting long wanem em i bin lukim olsem em i fowod pas.

Gerry Kaiuk husat i bin referi bilong dispela gren fainel gem i bin winim wisil long soim olsem dispela pas em fowod na em i no trai, tasol ol sapota bilong Taigas i no bin harim long wanem, ol i bin singaut na ron i go insait long fil pinis.

Siaman bilong NCD Sab

Eben Spots Asosiesen, Billy Aki, i lukim dispela na salim ol polis long kisim referi i kam aut sait long fil na kontrolim ol sapota.

Olgeta manmeri husat i bin stap long dispela taim, long dispela hap, i bin paol long husat stret i win. Ol opisal i bin kisim bikpela taim tru long mekim disisen long husat i win, na husat i lus.

Bihain long planti toktok, ol opisal i bin kamap wantaim fainel disisen, na givim win i go long Friwei Bampas.

Friwei Bampas i kisim K8000 na Taigas kisim K5000.

Aroma amamasim Krismas na Nu yia wantaim ragbi

Isaac Liri i raitim

LONG taim bilong Krismas na Nu Yia, planti ol ples insait long Papua Niugini i save amamas na kamap wantaim ol kain kain spot tonamen.

Long Aroma long Sentral provins, Is Aroma Kap i bin stat long namba 26 de bilong mun Desemba na bai i pinis long namba 3 de bilong Januari long Nupela Yia 2014.

Is Aroma Kap em wanpela ragbi nains tonamen. Ragbi nains em wankain olsem ragbi lig, tasol, i save gat 9-pela pilaia na i no 13 man olsem ragbi lig yumi save long en. Ol pilaia husat i save pilai ragbi union i save pilai ragbi nains tu.

Long dispela Is Aroma Kap

tonamen, 13 tim i pilai. Ol dispela tim em, Baika Bradas, K Marshall, G Stone, Tim KK, Wasa Wanbel, Verimu, Koboki Cowboys, Waira Plus, X11, KK Blacks Naua 1 na Vuru.

OTML husat em namba wan spona bilong dispela tonamen i tok, dispela Is Aroma Kap, i no wanpela nupela samting. Is Aroma Kap i save kamap olgeta taim bilong Krismas, na Aroma i save lukim ol top pilaia bilong ragbi union na ragbi lig i pilai.

Casper Kwalu, wanpela opisal bilong dispela tonamen i tok, as tingting bilong dispela tonamen em long bungim olgeta ragbi pilaia bilong Aroma, makim ol top pilaia na tu, strongim ragbi long eria.

Ol fainal bilong tonamen bai i kamap long Fraide.

i kam long pes 28

Gems Komiti wok wantaim pipel bilong PNG

Dispela ol riley gem bai i kamap long wankain taim wantaim Pasifik Gems. Na ol dispela riley bai i kamap long ol arapela provins long Papua Niugini. Na tu bai i gat ol arapela program tu.

GOC i statim wok-about bilong ol i go long ol arapela provins long toksave long las yia yet. As tingting bilong dispela wokabout long toksave, em long bung wantaim ol kampani, ogenaisesen, ol skul, na ol komiti, long tokim ol olsem ol tu bai i pilim dispela ekspirians bilong dispela ol bikpela gem we bai i kamap, na yumi olgeta Papua Niugini bai i amamas wantaim olsem wan famili.



Inglan keptan Alastair Cook givim kis long giaman tropi kap bilong Ashes gem bihain long final Tes 2013 seris long kriket pilai graun long London.



Olpela Fomula Wan sempion, Michael Schumacher i stap long koma na stap long haus sik bihain long taim em i pundaun na paitim het bilong em taim em i ski long French. Schumacher i kisim bikpela bagarap long kuru bilong em na dokta long French haus sik i bin operetim long namba tu taim, ripot i tok. Tok i no klia gut we em bai orait o nogat.

Guria i strongim tim bilong 2014 sisen

Michael Novingu i raitim

Sempion ragbi lig klap long Is Nu Briten, NGIP Agmark Guria i gat nupela kosa bilong klap long 2014 sisen.

Olpela Kumul pilaia na strongpela pilaia bilong NGIP Agmark Guria, Oscar Tonga i kisim wok bilong het kosa bilong klap.

Tonga i tok olpela kosa Michael Marum i givim em dispela wok bilong kosa. Michael Marum i kisim nupela wok olsem kosa bilong PNG SP Hunters long Kwinslen in-

trast supa lig kap.

Em i tok Marum i givim em dispela wok bikos em i gat planti save long pilai ragbi, na tu, em i gat strongpela manesemen disaplun long lukautim ol pilaia long taim bilong pilai na autsait long pilai.

Tonga i tok i no gat nupla stail bilong trening i stap. "Mipela bai bihainim tasol trening plen Marum i larim i stap long en."

Em i tok olgeta save bilong pilai na ol samting bilong pilai i stap na bai ol i yusim long trening na pilai.

Tonga i tok ol i sori na wari long

Marum i lusim ol tasol save bilong pilai em i givim ol pinis na bai ol i yusim.

Toga i tok olsem ol pilaia bilong em i trening strong nau long kamapim NGIP Agmark Guria klap i kamap strong na gohet long 2014 sisen.

Em i tok ol 35 pilaia bilong em i trening strong tru long go pilai wantaim Anda 20 tim bilong Bulldogs long Sidni, Australia long Januari 22. Ol i katim daun namba i kam daun long 25 pilaia.

Tonga i tok em i amamas long

lukim ol olpela pilaia bilong Guria i kam bek trening wantaim ol. Dispela pilaia em Junia Pango, Rolly Matlau, na Daniel Bai ol i saspending ol long ol bikhet pasin ol i bin mekim.

Em i tok Mathew Puke i go pilai wantaim Simbu Warriors na nau em i kam bek na trening wantaim ol. Na tu Samuel Hamari i go pilai wantaim Galp Isapea na em i kam bek na bai apim strong bilong ol Guria.

Tonga i tok em i amamas long lukim Guria i kamapim 3-pela pilaia

long Kumul tim, Dion Aiya, Ase Boas, na Francis Paniau. Em i tok tu ol 3-pela skul boi long junia PNG sait i stap insait long trening kem bilong em long go pilai long Australia.

Islands Petroleum kamapani i givim k170,000 long NGIP Agmark Guria long helpim ol long trening long go pilai long Sidni, Australia na tu, long ol trening na wokabaut bilong ol long pilai insait long kantri.

Tonga i tok tenkyu long Island Petroleum long dispela helpim ol i givim long sapotim Guria tim long gohet.

Painim Bal Resis

Namba 5

A B C D E F G



Putim X insait long bokis yu ting bal i stap long en..

Eksampel: C5, long namel. Teksim i kam na traime laki bilong yu.

Baim Wantok Niuspepa olgeta wik na traime sans bilong yu!!

Wanpela wina tasol long olgeta wik!

Wina bilong resis namba 5. Mobail namba 72398631.. Bai mipela i ring i kam na kisim nem na adres bilong yu.



Teksim Ansa bilong yu i kam long 7235 6149 na lusim nem na adres bilong yu tu...Sans yah!

Dispela resis bai stap i go inap long Desemba dispela yia, so noken wet, salim ol ansa kam na stail wantaim Wantok kep, t-siot na kola siot!!

Painim Bal Resis bai bai stat gen long yia 2014..Sekim namba long pes 2 na traime lak bilong yu!

Painim Bal Resis

A B C D E F G



ANSA bilong resis Namba 5

C9

Wanpela wina tasol long olgeta wik!

Nogat Nem bilong man/meri husat i givim rait ansa, tasol mobail namba bilong em i 72398631...Bai mipela i ringim yu!



Teksim Ansa bilong yu i kam long 7235 6149 na lusim nem na adres bilong yu tu...Sans yah!

Dispela resis bai stap i go inap long Desemba dispela yia, so noken wet, salim ol ansa kam na stail wantaim Wantok kep, t-siot na kola siot!!

Oi spot eksen poto long wiken...

Oi Poto Nicky Bernard.

1

2

3

4

5

- 1 MIPELA YAI!! Tim Maiyela i amasim Trophy ol winim long han bilong Gabutu long EPC soka resis.
- 2 Gren fainol pilai bilong Gavana Kap long Kone Tigers Ovol long Pot Mosbi.
- 3 Pilaia bilong Maiyela i traim long giamanim Gabutu pilaia long gren fainol pilai bilong ol long Bisini Soka grun long Pot Mosbi. Tupela tim wantaim i dro na go long penalty sut aut. Maiyela win 3-2.
- 4 KISIM YELO KAT!! Kepten bilong Maiyela kisim yelo kat olsem tok lukaut.
- 5 Gol Kipa bilong Maiyela kisim top pilaia awod bihain long em i sevim planti gol na mekim tim bilong em i win.

TOKSAVE: Salim ol spots dro bilong yu kam long Feks; 325 2579, e-mel;bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.



DIANA Blu
TUNA IN OIL

NEW IMPROVED!
 TUNA IN OIL
 Net Wt. 425g

Moa oil na meat insait

Gems Komiti wok wantaim pipel bilong PNG

WANTAIM nupela yia i kam pinis, Pasifik Gems Ogenaising Komiti (GOC), i wok strong yet long redi gut bipo long yia 2015, yia we Pasifik Gems bai i kamap long Papua Niugini.

Wanpela bikpela samting we GOC i wok long mekim long dispela taim, em long wok bung wantaim ol pipel insait long komiti, long redim ol long stap ol gutpela sitisen, taim ol spot manmeri bilong ol arapela kantri long Pasifik i kam long kantri.

Sif Eksekutyuv Opisa bilong GOC, Peter Stewart, i laikim ol manmeri bilong Papua Niugini long stap wantaim bel isi, na tu, soim gutpela pasin long ol spot manmeri husat i kam long ol arapela kantri.

Mista Stewart i laikim ol pipel long soim gutpela pasin long ol visita long wanem, em i bai givim gutpela nem long kantri bilong yumi, na ol manmeri bilong ol arapela kantri bai i apim na givim gutpela nem long kantri.

2015 Pasifik Gems bai i kamap long Pot Mosbi, tasol Mista Stewart i laikim ol manmeri long ol arapela provins long Papua Niugini long amamas tu, na long dispela as, em i tok GOC bai i kamap wantaim ol arapela spot progrem olsem komiti laiv rilei.

Moa long Pes 25.




Johnston's Pharmacies

TABU perfume, hand and body lotion products

perumed HAND AND BODY LOTION
 100g NET

TABU Cleaner

TABU perumed talcum powder

TABU Cleaner

TABU perumed talcum powder

TABU spray cologne

Ideal Gifts

P.O Box 1066 Boroko
 Phone: 325 3185, Fax: 325 0190
 Email: sales@johnstons.com.pg